

মহান মুক্তিযুদ্ধে পণ্ডিত জ্যোতিঃপাল মহাথেরোর অবদান : একটি সমীক্ষা

উৎস বড়ুয়া জয়

ভূমিকা

বাংলাদেশের মহান মুক্তিযুদ্ধের ইতিহাস অন্য দশ দেশের মুক্তিযুদ্ধের চেয়ে আলাদা। বাংলাদেশের সর্বস্তরের জনমানুষ অস্ত্র হাতে যুদ্ধ করেননি সত্য, কিন্তু কেউ বসে থাকেননি। কেউ অস্ত্র হাতে, কেউবা কলম হাতে, কেউবা মেধা মননশীলতা খাটিয়ে, কেউবা গানে গানে, কেউ শিল্পীর তুলির আঁচড়ে বাংলাদেশের জন্য সংগ্রাম করেছিলেন। বাংলাদেশের ইতিহাসে জাতিসত্তা হিসেবে বৌদ্ধরা অতি প্রাচীন। বাংলাদেশের ইতিহাস-ঐতিহ্য ও সংস্কৃতি বিনির্মাণে বৌদ্ধদের অসামান্য অবদান রয়েছে। এদেশের মহান স্বাধীনতা সংগ্রামসহ প্রতিটি প্রগতিশীল আন্দোলন-সংগ্রামে বৌদ্ধদের গৌরবময় অবদান লক্ষ্য করা যায়। পণ্ডিত জ্যোতিঃপাল মহাথের আমাদের মুক্তিযুদ্ধের সপক্ষে আন্তর্জাতিক জনমত গঠনে অনন্য ভূমিকা রেখেছিলেন। তাই তিনি ২০১০ সালে মরণোত্তর একুশে পদক, ২০১১ সালে স্বাধীনতা পদক লাভ করেছিলেন। স্বাধীনতার পক্ষে গুরুত্বপূর্ণ অবদান রাখায় তাঁকে এই রাষ্ট্রীয় স্বীকৃতি দেওয়া হয়। বুদ্ধের নির্দেশিত অহিংসার পথে থেকে ও যে মুক্তিযুদ্ধের পক্ষে কাজ করা যায় তার উজ্জ্বল দৃষ্টান্ত সংসার ত্যাগী মহান ব্যক্তি পণ্ডিত জ্যোতিঃপাল মহাথের। বাঙালি বীরের জাতি। শৌর্য বীর্য ও মহিমাম্বিত জাতি। দেশ প্রেমিতে স্বাধীনতা হল সকল জাতি, সকল সম্প্রদায় তথা নানা বর্ণ-গোত্র-জনমানুষের পরম আকাঙ্ক্ষার বিষয়। স্বাধীনতা বা মুক্তি হল প্রকৃত দেশপ্রেমের অমূল্য আকর। উল্লেখ্য যে, ১৯৯৬ সালের ২০শে সেপ্টেম্বর বাংলাদেশ বৌদ্ধ কৃষ্টি প্রচার সংঘের উদ্যোগে আয়োজিত সুধী সমাবেশে বাংলাদেশের মাননীয় প্রধানমন্ত্রী জননেত্রী শেখ হাসিনা মুক্তিযুদ্ধে বৌদ্ধ ধর্মীয় গুরুদের অবদান শ্রদ্ধার সংগে স্মরণ করে তিনি বলেন, বৌদ্ধ কৃষ্টি প্রচার সংঘের প্রয়াত সভাপতি মহাসংঘনায়ক বিশুদ্ধানন্দ মহাথের ও পণ্ডিত জ্যোতিঃপাল মহাথের, এদের মধ্যে একজন স্বদেশে মুক্তিযোদ্ধাদের বিভিন্নভাবে সহায়তা করেছেন, আশ্রয় দিয়েছিলেন, অন্যজন জাতির জনক বঙ্গবন্ধু শেখ মুজিবুর রহমানের সরকারের প্রতিনিধি হয়ে, বাংলাদেশের পক্ষে বিশ্ব জনমত গঠনে দক্ষিণ পূর্ব এশিয়ার বিভিন্ন দেশ সফর করেছেন। তাই বাংলাদেশের স্বাধীনতা অর্জনে তাঁদের অবদান জাতি কোনদিন ভুলতে পারবে না। মহান মুক্তিযুদ্ধে পণ্ডিত জ্যোতিঃপাল মহাথেরোর অবদান : একটি সমীক্ষা আলোচ্য প্রবন্ধে স্বাধীনতা সংগ্রামে পণ্ডিত জ্যোতিঃপাল মহাথেরোর অবদান ও মুক্তিযুদ্ধে সক্রিয় অংশগ্রহণ সম্পর্কে আলোচনা করা হয়েছে।

স্বাধীনতা যুদ্ধে বৌদ্ধ ভিক্ষুদের অবদান : একটি মূল্যায়ন

১৯৭১ এর মহান মুক্তিযুদ্ধে বৌদ্ধ ভিক্ষুদের অবদান, প্রত্যক্ষ ও পরোক্ষভাবে স্বাধীনতার পক্ষে অংশগ্রহণ আমাদের জাতিকে গর্বিত ও অনুপ্রাণিত করেছে। ১৯৭১ এর মহান মুক্তিযুদ্ধ বাঙালিদের জন্য স্মরণীয় এবং ত্যাগের মহিমায় মহিমাম্বিত একটা অধ্যায়। লাখো শহীদের আত্মত্যাগ ও লাখো মা-বোনের ইজ্জতের বিনিময়ে অর্জিত হয় সবুজের মাঝে রক্ত সূর্যখচিত একটি পতাকা, একটি স্বাধীন সার্বভৌম দেশ বাংলাদেশ। তাই মুক্তিযুদ্ধ আমাদের গর্ব, আমাদের প্রেরণার উৎস। একাত্তরের মহান মুক্তিযুদ্ধে বৌদ্ধ ভিক্ষুরা প্রত্যক্ষ ও পরোক্ষভাবে কাজ করে গেছেন। যাদের জন্য আমরা গর্বিত এবং অনুপ্রাণিত। প্রয়াত মহাসংঘনায়ক সমাজ সংস্কারক বিশুদ্ধানন্দ মহাথের এবং সংঘরাজ পণ্ডিত জ্যোতিঃপাল মহাথের, শহীদ জিনানন্দ ভিক্ষুর নাম সবিশেষ উল্লেখযোগ্য। বাংলাদেশের মুক্তি সংগ্রামে বাঙালি বৌদ্ধ নেতৃবৃন্দ প্রধানত দুইভাবে সক্রিয় ভূমিকা পালন করেন। প্রথমত: দেশের অভ্যন্তরে বৌদ্ধদের জান মাল রক্ষায় প্রয়াত মহাসংঘনায়ক বিশুদ্ধানন্দ মহাথেরর নেতৃত্বে অভ্যন্তরীণ মিশনারী কাজ, দ্বিতীয়ত: মুক্তিযুদ্ধের স্বপক্ষে জনমত গঠন ও সমর্থন লাভে সংঘরাজ জ্যোতিঃপাল মহাথের বহির্বিদেশের বৌদ্ধদেশ সমূহ পরিভ্রমণ। উল্লেখ্য যে, এই দুই মহান সাংঘিক ব্যক্তিত্ব কৃতকর্মের স্বীকৃতি স্বরূপ পণ্ডিত জ্যোতিঃপাল মহাথের মহান একুশে পদক ও স্বাধীনতা পদক এবং মহাসংঘনায়ক বিশুদ্ধানন্দ মহাথের মহান একুশে পদক লাভ করেন। বাংলা একাডেমী কর্তৃক প্রকাশিত ভিক্ষু সুনীথানন্দ রচিত “বাংলাদেশের বৌদ্ধ বিহার ও ভিক্ষু জীবন” গ্রন্থে বর্ণিত আছে, ১৯৭১ সালে মুক্তিযুদ্ধের সময় প্রয়াত মহাসংঘনায়ক বিশুদ্ধানন্দ মহাথের বৌদ্ধ কৃষ্টি প্রচার সংঘের মাধ্যমে বৌদ্ধ পরিচয় পত্র দিয়ে অনেক মুক্তিযোদ্ধাকে নিরাপদ আশ্রয়ে রেখেছিলেন। অনেক হিন্দু, মুসলমানকে প্রাণে রক্ষা করেছেন। বৌদ্ধ ভিক্ষুরা মানব সেবা, ধর্মপ্রচার, শিক্ষাব্রতী এবং দেশ মাতৃকার জন্য নিবেদিত প্রাণ।

স্বাধীনতা যুদ্ধে পণ্ডিত জ্যোতিঃপাল মহাথের এক অবিসংবাদিত নাম

ব্রিটিশ শাসনামলে তদানীন্তন ত্রিপুরা বা বর্তমান কুমিল্লা জেলার লাকসাম থানাধীন কেমতলী গ্রামে ১৯১৪ সালের ৫ জানুয়ারি জন্মগ্রহণ করেন দ্বারিকা মোহন সিংহ নামে এক শিশু। এই অঞ্চলের পারিবারিক উপাধি হল ‘সিংহ’। ঐতিহাসিক ব্যাখ্যায় বলা হয়,

দুইহাজার ৫৫৬০ বছর আগে জন্ম নেওয়া শাক্যবংশীয় রাজপুত্র সিদ্ধার্থের(পরবর্তীতে গৌতম বুদ্ধ) পারিবারিক নাম ‘শাক্যসিংহ’ থেকে এই অঞ্চলের বৌদ্ধরা ‘সিংহ’ উপাধি ধারণ করেন। ১৯৩৩ সালে ১৯ বছর বয়সে তিনি আগারিক জীবন থেকে অনাগারিক জীবনে প্রবেশ করেন। তখন তাঁর নাম রাখা হয় জ্যোতিঃপাল শ্রামণ। পরে তিনি ১৯৩৮ সালে ১৪ জুলাই শুভ উপসম্পদা লাভ করে জ্যোতিঃপাল ভিক্ষু নাম ধারণ করেন। বৌদ্ধ ধর্মে তিনি সুত্র, বিনয় ও উপাধি ডিগ্রী নিয়েছিলেন।^৭

তিনি ভারতের নালন্দা বিদ্যাভবন থেকে ত্রিপিটক বিশারদ উপাধি এবং ১৯৪৬ সালে কলকাতা সংস্কৃত ও পালি বোর্ড আয়োজিত অভিধর্ম উপাধি পরীক্ষায় প্রথম হয়ে স্বর্ণপদক লাভ করেন। তিনি আনুষ্ঠানিক উচ্চতর শিক্ষা না করলেও উচ্চ ইংরেজি বিদ্যালয়ে প্রবেশিকা শ্রেণী পর্যন্ত পৌঁছান। দৃঢ়চেতা সার্বজনীন কল্যাণে উৎসর্গীত এই বৌদ্ধ ভিক্ষুর বর্ণাঢ্য জীবন কৃতিত্ব ও অর্জনে ভরপুর। তিনি মৃত্যুর পূর্ব পর্যন্ত বাংলাদেশি বৌদ্ধদের সর্বোচ্চ ধর্মীয় গুরু ছিলেন। তিনি বাংলাদেশের বৌদ্ধ ভিক্ষুদের বৃহত্তর সাংঘিক সংগঠন সংঘরাজ ভিক্ষু মহাসভার দশম সংঘরাজ ছিলেন। বৌদ্ধ ভিক্ষু হওয়ার পাশাপাশি তাঁর আরো অনেক পরিচয় আছে। তিনি একাধারে একজন সাহিত্যিক, সংগঠক, শিক্ষানুরাগী, সমাজকর্মী, গবেষক,লেখক, কর্মবীর, দেশপ্রেমে উদ্বুদ্ধ অসাম্প্রদায়িক ব্যক্তিত্ব সমাজ, সংস্কারক এবং মুক্তিযুদ্ধের সংগঠক। কুমিল্লার অনগ্রসর পশ্চাদপদ মানুষেরজন্য তিনি আজীবন কাজ করে গেছেন। কুমিল্লার বিভিন্ন গ্রামে সাতটি বৌদ্ধ বিহার প্রতিষ্ঠা করেছেন। ১৯৪২ সালে লাকসামে একটি অনাথালয় স্থাপন করেন। জাতি, ধর্ম নির্বিশেষে গরীব ছাত্র ও অনাথদের শিক্ষা ও বাসস্থানের জন্য তিনি এই অনাথ আশ্রম প্রতিষ্ঠা করেছিলেন। ১৯৪৬ সাল থেকে লাকসাম উচ্চ ইংরেজি বিদ্যালয়ে শিক্ষক হিসেবে দায়িত্ব পালন করেন এবং পরবর্তীতে তাঁর একান্ত সহযোগিতায় প্রতিষ্ঠিত লাকসাম থানাধীন হরিশ্চর ইউনিয়ন উচ্চ বিদ্যালয়ে বিনা বেতনে প্রায় ৩৩ বছর ধরে শিক্ষকতা করেন। তিনি ১৯৩৯ সালে বরইগাঁও পালি কলেজ, ১৯৪৮ সালে মৌমাছি পালন ও গবেষণা কেন্দ্র, ১৯৪৯ সালে কৃষকদের সমবায় সমিতি, বস্ত্র নির্মাণ, উল তৈরি ও ছাত্রদের সেলাই প্রশিক্ষণ কেন্দ্র স্থাপন করেন। ১৯৮২ সালে চট্টগ্রাম বিশ্ববিদ্যালয়ে বিশ্বশান্তি প্যাগোডা ও গোবিন্দ-গুণালংকার বৌদ্ধ ছাত্রাবাস, ১৯৯১ সালে নারী শিক্ষা বিস্তারে কুমিল্লার বালিকা উচ্চ বিদ্যালয় প্রতিষ্ঠা করেন। এছাড়া ১৯৯১ সালে বালক উচ্চ বিদ্যালয়, ১৯৬৮ সালে একটি প্রাথমিক বিদ্যালয় প্রতিষ্ঠা করে কুমিল্লার শিক্ষা বিস্তারে অগ্রণী ভূমিকা পালন করেন। তাই কুমিল্লা অঞ্চলে তিনি বৌদ্ধদের কাছে নন্দিত ধর্মগুরু, মুসলমানদের কাছে মানবতাবাদী পীরতুল্য ব্যক্তিত্ব এবং হিন্দুদের কাছে পবিত্র গুরু হিসেবে শ্রদ্ধার আসনে প্রতিষ্ঠিত ছিলেন। সেবা-মানবতার পাশাপাশি তিনি সাহিত্য রচনায়ও অসামান্য অবদান রাখেন। কর্মতত্ত্ব, উপ-সংঘরাজ গুণালংকার মহাশ্ববিরের আত্মজীবনী, পুণ্ডল পত্রোৎসব, বোধিচর্যাবতার, সাধনার অন্তরায়, প্রজ্ঞাভূমি নির্দেশ, ভারতে বৌদ্ধধর্মের উত্তান-পতন, ব্রহ্মবিহার, চর্যাপদ, বুদ্ধের জীবন ও বাণী, রবীন্দ্র সাহিত্যে বৌদ্ধ সাহিত্য, বৌদ্ধ সংস্কৃতি, সৌম্য সাম্যই শান্তির কারণ, ভক্তি শতকম, বৌদ্ধ ধর্মীয় শিক্ষা, বৌদ্ধ ধর্ম সংস্কৃতির ক্রমবিকাশ ও পঞ্চবুদ্ধ, মালয়েশিয়া ভ্রমণ কাহিনী, বাংলাদেশের মুক্তিসংগ্রাম এবং পালি বাংলা অভিধান সম্পাদনা তাঁর গভীর পাণ্ডিত্যের পরিচয় বহন করে।^৮

বহুমুখীপ্রতিভাবান কীর্তিমান জ্যোতিঃপাল মহাশ্বের জীবনে অনেক সম্মাননা পেয়েছিলেন। তাঁর কর্ম প্রতিভা এক সময় দেশের মাটিকে ছাড়িয়ে যায়। তিনি হয়ে উঠেন বিশ্ববরেণ্য ব্যক্তিত্ব। ১৯৯৫ সালে বিশ্বের সর্বোচ্চ সংগঠন জাতিসংঘ বিশ্বশান্তি মানবতা ও নিরস্ত্রীকরণের ক্ষেত্রে অমূল্য অবদানের জন্য তাঁকে ‘বিশ্ব নাগরিক’ উপাধি প্রধান করেন। এই দুর্লভ উপাধি প্রাপ্তিতে তিনি হয়ে গেলেন বিশ্বজনীন ধর্মগুরু। এই উপাধি দ্বারা তিনি নিজে একা গর্বিত হননি, গর্বিত হয়েছেন পুরো বাঙালিজাতি ও দেশবাসী। ১৯৭৫ সালে তিনি এশীয় বৌদ্ধ শান্তি সংস্থার বাংলাদেশ জাতীয় কেন্দ্রের চেয়ারম্যান নিযুক্ত হয়। ১৯৭৬ সালে জাপানে অনুষ্ঠিত হিতোসি বার্ষিকী ও মঙ্গোলিয়ার রাজধানী উলান বাটোরে অনুষ্ঠিত সাধারণ অধিবেশনে বাংলাদেশের প্রতিনিধিত্ব করেন। এশীয় বৌদ্ধ শান্তি সংস্থা মঙ্গোলিয়া হতে ১৯৭৮ সালে তাঁকে স্বর্ণপদকে ভূষিত করা হয়।

তাঁর গৌরবোজ্জ্বল সাংঘিক জীবনের এক অসাধারণ হল নিখুঁত দেশপ্রেম। পাক বাহিনীর বর্বরতা সম্পর্কে যাতে বিশ্ববাসী সহজে জানতে না পারে তৎজন্য তদানীন্তন পাকিস্তান সরকার সকল বিদেশি সাংবাদিককে পাকিস্তান ছাড়ার নির্দেশ দিয়েছিলেন। অবশ্য জীবনের ঝুঁকি নিয়ে কেউ কেউ আত্মগোপনে থেকে গিয়েছিলেন। তাঁরা পাকিস্তানি বর্বরতার সংবাদ সচিত্র তুলে ধরে বিশ্ববিবেককে নাড়া দিয়েছিলেন। তবে বিশ্ব জনমত গঠনে জ্যোতিঃপাল মহাশ্বের অনন্য অসাধারণ ভূমিকা ছিল।

এপ্রিল মাসের শেষের দিকে আগরতলার বাংলাদেশ মিশনের পূর্বাঞ্চলীয় বিভাগের বিশিষ্ট নেতৃবৃন্দ জহুর আহমেদ চৌধুরী, মাহবুব আলম চাষী, সৈয়দ আলী আহসান, এইচ টি ইমাম, আকবর আলী খান প্রমুখের সাথে তাঁর যোগাযোগ হয়। তাঁদের সাথে আলোচনার পর তিনি বাংলাদেশের স্বাধীনতা সংগ্রামের পক্ষে বিশ্ব বৌদ্ধদের তথা বিশ্ববাসীর মধ্যে জনমত গঠনের সিদ্ধান্ত গৃহীত হয়।

তিনি উপলব্ধি করতে পেরেছিলেন, পাক সামরিক বাহিনীর গণহত্যা, নির্যাতন বন্ধের জন্য আন্তর্জাতিক চাপ সৃষ্টি অপরিহার্য। তিনি স্বাধীনতা সংগ্রামী সহযোগীদের পরামর্শ নিয়ে বাংলাদেশে পাক-বাহিনীর গণহত্যা ও নির্যাতনের বিবরণ সম্বলিত প্রচারপত্র তৈরি করেন। জাতিসংঘের তদানীন্তন মহাসচিব মি.থান্ট এবং শ্রীলংকার প্রধানমন্ত্রী শ্রীমাভো বন্দরনায়েকসহ পৃথিবীর সকল দেশের বিশ্ব

বৌদ্ধ সৌভ্রাতৃত্ব সংঘের আঞ্চলিক শাখা ও বৌদ্ধ সমিতিগুলোর কাছে বাংলাদেশে পাকিস্তানি গণহত্যা ও নির্যাতন বন্ধে চাপ সৃষ্টির আবেদন করেন। এদিকে মুজিব সরকার এবং ভারত এশীয় বৌদ্ধ দেশগুলোতে প্রতিনিধি পাঠানোর সিদ্ধান্ত নেন। এ সিদ্ধান্ত পূর্বাঞ্চলীক মিশনের অন্যতম কর্মকর্তা এইচ টি ইমাম সাহেবকে টেলিগ্রামে জানানো হয়।^৬

টেলিগ্রামে জ্যোতিঃপাল মহাথের এবং পার্বত্য চট্টগ্রামের মানরাজা মংপ্রুং সেইন চৌধুরীকে মুজিব নগরে পাঠানোর কথা বলা হয়। জুলাই মাসের প্রথম সপ্তাহে জ্যোতিঃপাল মহাথের মুজিব নগরে উপনীত হন। সেখানে হাইকমিশনার আলী হোসেন, আবদুল করিম চৌধুরী, তাহের উদ্দিন ঠাকুর, মাহবুব আলম চাষী প্রমুখ তাঁকে বিদেশ গমনের উদ্দেশ্য এবং করণীয় সম্পর্কে প্রয়োজনীয় ধারণা দিলেন। জুলাই মাসের দ্বিতীয় সপ্তাহে তিনি আগরতলা থেকে কলকাতা এবং পরে নয়াদিল্লী গিয়েছিলেন।

নয়াদিল্লীতে জগৎজ্যোতি বিহারের অধ্যক্ষ ভারতীয় রাজ্যসভার সদস্য ধর্মবীরিয় মহাথেরের সহায়তায় ভারতের বৌদ্ধ নেতা এবং সংসদ সদস্যদের সাথে দেখা করেন। ২৯ জুলাই তিনি ভারতের তৎকালীন প্রধানমন্ত্রী ইন্দিরা গান্ধীর সাথে সাক্ষাত করে বাঙ্গালী জনগণ এবং বৌদ্ধদের উপর চলমান বর্বরতার বর্ণনা দেন। ৭ আগস্ট অ্যাডভোকেট ফকির সাহাবুদ্দিন সাহেবসহ তিনি শ্রীলংকার উদ্দেশ্যে যাত্রা করেন। উল্লেখ্য, যুদ্ধকালীন সময়ে বাংলাদেশের সাথে পাকিস্তানের স্থলপথ ও আকাশপথ এক প্রকার বিচ্ছিন্ন ছিল। শুধু কলম্বো বিমানবন্দর হয়ে বাংলাদেশে উড়োজাহাজ চলাচলের সুবিধা ছিল। তাঁরা শ্রীলংকাকে বুঝাতে সক্ষম হলেন যে, পাকিস্তানি উড়োজাহাজের মাধ্যমে বাংলাদেশে সৈন্য (৫০০) করে এবং অস্ত্র পাঠানো হচ্ছে। তাঁরা পাকিস্তানি বাহিনীর জন্য শ্রীলংকার আকাশপথ বন্ধ করে দেয়ার জন্য পাঁচ মন্ত্রীর স্বাক্ষরিত একটি আবেদনপত্র তৎকালীন প্রধানমন্ত্রী শ্রীমাভো বন্দরনায়কের কাছে পেশ করেন। এর পরিপ্রেক্ষিতে পরদিন থেকে পাকিস্তানি বিমানের যাতায়াত বন্ধ করে দেওয়া হয়। এতে করে পাকিস্তানের যুদ্ধের মূল চালিকা শক্তি সেনাদের রসদ, গোলাবারুদ ও অস্ত্র সম্পূর্ণরূপে বন্ধ হয়ে যায়।

এরপর তিনি এবং শাহাবুদ্দিন সাহেব ১১ আগস্ট থাইল্যান্ড, ১৬ আগস্টজাপানে একই কাজ করেন। পরে ২২ আগস্ট জ্যোতিঃপাল মহাথের হংকং হয়ে নয়াদিল্লী প্রত্যাবর্তন করেন এবং শাহাবুদ্দিন সাহেব হংকং থেকে মালয়েশিয়া ও সিঙ্গাপুর পরিভ্রমণ করে দিল্লী ফিরে আসেন। ১৮ ও ২০ সেপ্টেম্বর নয়াদিল্লীতে অনুষ্ঠিত আন্তর্জাতিক সম্মেলনে আমন্ত্রিত প্রতিনিধি হিসেবে জ্যোতিঃপাল মহাথের অংশগ্রহণ করেন। এই সম্মেলনে চট্টগ্রাম বিশ্ববিদ্যালয়ের তৎকালীন উপাচার্য ড. এ আর মল্লিক ও সৈয়ত আলী আহসান ছিলেন অন্যতম প্রতিনিধি। সম্মেলনে ৩১ টি দেশের প্রতিনিধি যোগদান করেছিলেন। এ সম্মেলনে যোগদানকারী বৌদ্ধ প্রতিনিধিদের জ্যোতিঃপাল মহাথের দিল্লীর জগৎজ্যোতি বিহারে আমন্ত্রণ করে নিয়ে যান এবং সেখানে তিনি এ দেশের মানুষের উপর পাক-বাহিনীর অত্যাচারের বিবরণ বিশদভাবে তুলে ধরেন। জ্যোতিঃপাল মহাথের সম্পর্কে কুমিল্লার প্রান্তন সংসদ সদস্য অধ্যক্ষ আবুল কালাম মজুমদার লিখেছেন, আমি জানি যে, “একমাত্র জ্যোতিঃপাল মহাথের ব্যতীত বাংলাদেশের অন্য কোন ধর্ম সম্প্রদায়ের উদ্ধৃতন ধর্ম-যাজক বাংলাদেশ স্বাধীনতা সংগ্রামে যোগদান করে সহযোগিতা করেননি”। কিন্তু তিনি দেশপ্রেমে উদ্বুদ্ধ হয়ে মাতৃভূমি উদ্ধার কল্পে ঝাঁপিয়ে পড়েছিলেন। কুমিল্লা জেলা মুক্তিযোদ্ধা সংসদের ডেপুটি কমান্ডার মোঃ জহিরুল ইসলাম বলেছেন, বাংলার বৌদ্ধ সম্প্রদায়ের মধ্যে স্বাধীনতা আন্দোলনে উচ্চ পর্যায়ে আন্তর্জাতিক সংগঠক রূপে সহযোগিতা করেছেন কুমিল্লা নিবাসী মাননীয় জ্যোতিঃপাল মহাথের।

পণ্ডিত জ্যোতিঃপাল মহাথের আন্তর্জাতিক পরিমণ্ডলে বাংলাদেশের স্বাধীনতার স্বপক্ষে জনমত গঠনে পরিপূর্ণভাবে সফল হয়েছিলেন। বিশেষ করে বৌদ্ধ রাষ্ট্রগুলোকে বুঝাতে সক্ষম হয়েছিল। অবশেষে বাংলাদেশের স্বাধীনতা লাভের পর ১৯৭২ সালের ৭ জানুয়ারি নিজ সাধনপীঠ কুমিল্লা প্রত্যাবর্তন করেন এবং ১০ জানুয়ারি তিনি ঢাকায় উপনীত হন। সেখানে বাংলাদেশ সংবাদ সংস্থার (বাসস) তৎকালীন ব্যবস্থাপনা পরিচালক এবং প্রধান সাংবাদিক দেবপ্রিয় বড়ুয়ার (ডি.পি বড়ুয়া) ধানমন্ডির বাড়িতে উঠেন। ধানমন্ডির বাসায় অস্থানকালে বাংলা সাহিত্যের দিকপাল সৈয়দ মুজতবা আলী তাঁর সাথে সাক্ষাত করতে আসেন। ১৯৭২ সালের ১২ জানুয়ারী সদ্য কারামুক্ত জাতির পিতা বঙ্গবন্ধু শেখ মুজিবুর রহমানের সাথে সাক্ষাত করেন। জ্যোতিঃপাল মহাথের তাঁর মুক্তিযুদ্ধে অংশ গ্রহণের ভিত্তিতে প্রণীত “বাংলাদেশ মুক্তিসংগ্রাম” গ্রন্থে (১৯৭৭) লিখেছেন, ‘আমি যখন বঙ্গবন্ধুর সামনে গিয়ে দাঁড়ালাম তখন আমার এক পার্শ্বে বঙ্গবন্ধুর তদানীন্তন প্রেস সেক্রেটারী জনাব আমিনুল হক বাদশা এবং আরেক পার্শ্বে মুজিবনগরের পরিচিত এক বন্ধু জনাব বাদশা বঙ্গবন্ধুর সাথে আমাকে পরিচয় করিয়ে দিলেন এবং বাংলাদেশে আন্দোলনে আমার ভূমিকা সম্পর্কে বলতে আরম্ভ করলেন। বঙ্গবন্ধু আমাকে বুক জড়িয়ে ধরলেন। আমিও তাকে জড়িয়ে ধরলাম এবং বললাম, না, আমি বাংলাদেশের জন্য কিছু করতে পারিনি। তবে দেশ বিদেশে গিয়ে মানুষের কাছে বাংলাদেশের জন্য কেঁদেছি। তিনি আমার কথা শুনে খুব আনন্দ ও বিস্ময় প্রকাশ করলেন’।^৭

দেশপ্রেমে উদ্দীপ্ত পুণ্যপুরুষ জ্যোতিঃপাল মহাথের বর্ণাঢ্য জীবন প্রদীপ নিভে যায় ৯২ বছর বয়সে ২০০২ সালের ১২ এপ্রিল। একজীবনে জাতি, সমাজ, ধর্ম, রাষ্ট্র এবং মানবতার জন্য কাজ করার সৌভাগ্য সবার হয় না। কিন্তু পণ্ডিত জ্যোতিঃপাল মহাথের ছিলেন সেই সৌভাগ্যবান মহান ব্যক্তিত্ব। জীবনের প্রান্ত সীমানায় উপনীত হওয়ার পরও তাঁর সারগর্ভ, তথ্যবহুল ঐতিহাসিক বক্তব্য

এবং বাচনভঙ্গি ছিল অন্তরহোঁয়া। বিশিষ্ট সাহিত্যিক অধ্যাপক আবুল ফজল বলেছেন, “মাননীয় জ্যোতিঃপাল মহাথের বাংলাদেশের একজন প্রথিতযশা পণ্ডিত ও নিষ্ঠাবান সমাজকর্মী। বাংলাদেশের বৌদ্ধদের একটি জাতীয় প্রতিষ্ঠানের প্রধান হিসেবে তিনি আমাদের স্বাধীনতা সংগ্রামে যে ভূমিকা পালন করেছিলেন তা ছিল একদিকে মিথ্যার সাথে আপোষহীন, অন্য দিকে ছিল অত্যাচার নিপীড়নের বিরুদ্ধে প্রতিবাদ মুখর। মহামানব গৌতম বুদ্ধের সাম্য-মৈত্রী-করুণা ও অহিংসার আদর্শে নিবেদিত-প্রাণ গৈরিকবসনধারী এই বৌদ্ধ ভিক্ষুর মুক্তি সংগ্রামকালীনকর্মতৎপরতা, বিশেষত প্রতিবেশী রাষ্ট্র ভারত থেকে শুরু করে, শ্রীলংকা, থাইল্যান্ড, জাপান প্রভৃতি দক্ষিণপূর্ব এশীয় বৌদ্ধ প্রধান দেশগুলোতে ব্যাপক সফরের মাধ্যমে হানাদার বাহিনীর নৃশংস নির্যাতন ও গণহত্যার সঠিন বিবরণ প্রচার ও তার বিরুদ্ধে প্রবল প্রতিবাদ জ্ঞাপন বাংলাদেশের স্বাধীনতার সপক্ষে বিশ্বজনমত গঠনে প্রভূত সহায়তা করেছিল। তাই মাননীয় জ্যোতিঃপাল মহাথের স্বাধীনতা যুদ্ধের সেই দুঃসহ ভয়াবহ দিনগুলিতে বিবেকের কণ্ঠস্বর হিসেবে দেশ-বিদেশে খ্যাত ও স্বীকৃত হয়েছিলেন।”

বাংলাদেশ মুক্তি সংগ্রামে পূর্ব-পশ্চিম বিরোধের পটভূমিকা

মহান মুক্তিযুদ্ধের ঐতিহাসিক দলিল ‘স্বাধীনতা সংগ্রাম’ গ্রন্থে পণ্ডিত জ্যোতিঃপাল মহাথের উল্লেখ করেন যে, সুদীর্ঘ বাইশ বৎসর পর প্রথম বারের মত পাকিস্তান সরকার ১৯৭০ সালে পাকিস্তানে সাধারণ নির্বাচন অনুষ্ঠানের সিদ্ধান্ত গ্রহণ করেছিলেন। এই সিদ্ধান্তের পরিপ্রেক্ষিতে পাকিস্তান সাধারণ নির্বাচনে অনুষ্ঠিত হয় ১৯৭০ সনের ৭ই ডিসেম্বর থেকে ১৯৭১ সালের ১৭ই জানুয়ারি পর্যন্ত। এই সাধারণ নির্বাচনে সুস্পষ্ট ভাবে গ্রহণ করেছিল যে, দেশের জনসাধারণের বিপুল সংখ্যাগরিষ্ঠ অংশ আওয়ালী লীগের ধর্ম নিরপেক্ষ ও গণতন্ত্রমূলক কর্মসূচির পিছনে রয়েছে। পূর্ব পাকিস্তানে জন্য নির্ধারিত ১৬৯ জন প্রতিনিধি মধ্যে আওয়ালী লীগ সদস্যই নির্বাচিত হলেন ১৬৭ জন। কিন্তু এই সংখ্যাগরিষ্ঠতা সরকারের নিকট অসহ্য গাত্র দাহের হেতু হয়ে দাঁড়ায় আইনসঙ্গতভাবে আওয়ালী লীগ দেশের শাসনভার পরিচালনার যোগ্যতা অর্জন করেন। কিন্তু সকল নির্বাচিত সদস্যগণের সম্মিলিত পরামর্শে জাতীয় গণপরিষদে একসঙ্গে বসে শাসনতন্ত্র আলোচনা বা প্রণয়ন করার অধিকার পাওয়া গেল না। অথচ এই নির্বাচনের মুখ্য উদ্দেশ্যই ছিল প্রতিনিধি নির্বাচনের মাধ্যমে একটি শাসকতন্ত্র রচনা করা। বস্তুত নির্বাচনের প্রতি পাকিস্তান সরকারের একটি শাসনতন্ত্র রচনা করা।^৮

প্রকৃতপক্ষে নির্বাচনের প্রতি পাকিস্তান সরকারের নিরপেক্ষ দৃষ্টিভঙ্গী ছিল না। পূর্বঞ্চল কমান্ডের অধিনায়ক বা জিওসি জেনারেল সাহেবজাদা ইয়াকুব ঢাকা গ্যারিসনের অফিসারদের এক সমাবেশ ভাষণ দানকালে আয়ুব সরকারের পতনোত্তর ঘটনাবলীর ধারাবাহিক বিবরণ দিয়েছিলেন। তিনি ভাষণের সমাপ্তি মন্তব্য করেছিলেন গণতান্ত্রিক পদ্ধতিতে নির্বাচিত সরকারের কাছে শান্তিপূর্ণভাবে ক্ষমতা ছেড়ে দেওয়ার জন্যে এখন চূড়ান্ত পর্যায় এসে গেছে। অবশ্য তিনি একথাও বলেছিলেন আপনারা ওদের বাঙালিদের সাথে ভাল ব্যবহার করবেন। প্রেসিডেন্ট ইয়াহিয়া খান জনগনকে বলেছিলেন আমি একজন সৈনিক আমি ব্যারাকে ফিরে যেতে চাই। জনগনকে আশ্বস্ত করার মত ভাষার তিনি এভাবে তার মনোভাব ব্যক্ত করেছিলেন-পূর্ব পাকিস্তানের ৭৫ মিলিয়ন অধিবাসীকে রাষ্ট্রীয় প্রশাসনের সাথে অংশগ্রহণের ব্যাপারে উদ্ধৃত করতে হলে তাদের সরকারি পর্যায় প্রাপ্য সুযোগ দেওয়া উচিত। কি সহজ স্বাধ্য সত্য সরল তরল স্পষ্ট সংক্ষিপ্ত উক্তি। এতে জনগণ অবচেতন ব্যক্তিবর্গ একেবারে যুক্ত। এতে সন্দোহমূলক প্রমাদ গণবার কি আছে? এদিকে সব কিছু ব্যাপারেই পশ্চিম পাকিস্তানীরা সিংহভাগ উপভোগ করত। বিদেশি সাহায্যের শতকরা ৭০ ভাগ নিয়োজিত হতে তাদেরই জন্য। পূর্ব পাকিস্তানের বিদেশি মুদ্রা আয়ের অংক একইভাবে আমদানিকৃত দ্রব্যের জন্যে। পূর্ব পাকিস্তানের বিদেশি মুদ্রা আয়ের অংক একইভাবে আমদানিকৃত দ্রব্যের জন্যে পশ্চিম পাকিস্তানের ক্ষেত্রে ব্যয় করা হতো। কেন্দ্রীয় আমলাতন্ত্রের শতকরা ৯০ ভাগ এবং সেনাবাহিনীর শতকরা ৯৫ ভাগ ক্ষেত্রে ওদের একচেটিয়া আধিপত্য ছিল। সুস্পষ্ট কারণেই ছয় দফা অথবা এর প্রণেতা শেখ মুজিবুর রহমান সাহেবের প্রতি ইয়াহিয়া খানের অনুকূল ধারণার উদ্ভব হয়েছিল বলে জনগণের বিশ্বাস জন্মে ছিল। কিন্তু এটা যে রাজনৈতিক ধাপ্লাবাজি রাজনৈতিক চাল বা রাজনৈতিক সচেতন ব্যক্তি ব্যতীত সকলের বোধগম্যে আসেটি। জনগণের এই ধারণার ভেতর কুঠারাঘাত আনল ১৯৭০ সালের নভেম্বর মাসে বাংলাদেশের উপকূলবর্তী এলাকার যখন সাইক্লোন প্রচণ্ড আঘাত হেনেছিল তখন তারা জ্বলন্ত অবজ্ঞা ও দাসিন্য ভাব তার কীটিকে মারাত্মকভাবে বিধ্বস্ত করে ফেলেছিল।^৯

বাঙালির প্রতি প্রকৃত মনোভাব উন্মুক্ত হয়ে পড়েছিল। আসল চরিত্রটা ধরা পড়ে গিয়েছিল। ফেব্রুয়ারি মাসে ইসলামাবাদে অনুষ্ঠিত গভর্নর ও সাময়িক আইন প্রশাসকদের এক অধিবেশন জনশ্রুতির মাত্রা বেড়ে দেয়। এখানে ইয়াহিয়া খান সমবেত সবাই জানিয়ে দেন, ৩রা মার্চ তারিখে ঢাকায় জাতীয় পরিষদের যে অধিবেশন হওয়ার কথা ছিলো তা অনির্দিষ্ট কালের জন্যে স্থগিত রাখা হয়েছে। এডমিরাল আহসান এবং লেঃ জেনারেল রহমান গুল উক্ত সিদ্ধান্ত পুনঃবিবেচনার জন্যে প্রেসিডেন্টকে বারংবার জানান। কিন্তু প্রেসিডেন্ট ইয়াহিয়া খান তাদের কথায় কর্ণপাত না করে তার সিদ্ধান্তে তিনি অটল থাকেন। ফেব্রুয়ারি মাসের শেষের দিকে আহসানকে ঢাকায় গিয়ে ৩রা মার্চ জাতীয় পরিষদের অধিবেশন অনির্দিষ্ট কালের জন্যে স্থগিত রাখার বিষয়টি ২৮ শে ফেব্রুয়ারি তারিখে

শেখ মুজিবুর রহমানকে অবগত করানো হয়। এর ফলে বাংলাদেশে উগ্র প্রতিক্রিয়া ঘটে। সারাদেশে এ ভাষণের পরপরই জনগন রাস্তার ক্ষোভে ফেটে পড়ে। প্রতিবাদ মিছিলে ঢাকাসহ বিভিন্ন শহর বন্দর রাস্তা ঘাট ভরে উঠে। লেঃ জেনারেল ইয়াকুব কারফিউ জারী করে সেনাবাহিনী যুদ্ধাবস্থার তৎপরতায় সড়ক পাহারা দেওয়ার জন্য নির্দেশ দেন। এডমিরাল আহসান আবার একই বিষয় নিয়ে প্রেসিডেন্টকে বারবার অনুরোধ করতে আহসানের প্রতি সন্দেহ জন্মিল যে, তিনি হয়তো পূর্ব পাকিস্তান প্রিয়। ফল ফলল বিপরীত সেই রাতেই আহসানের পদচ্যুতি ঘটল। অন্যতম যুদ্ধবাজ লেঃ জেনারেল টিক্কা খানকে ইসলামাবাদে ডেকে এনে আহসানের স্থলে নিয়োগ করা হয়। ইতিমধ্যে জুলফিকার আলী ভুট্টো পূর্ব পাকিস্তানের বিরুদ্ধে বারংবার বিবেচনা করে বিভিন্ন উক্তি করেছিলেন। টিক্কা খানও অনুরূপ উক্তি বারবার করেছেন। যথেষ্ট ক্ষমতা প্রদত্ত হলে আমি ওদেরকে নিশ্চিহ্ন করে দেবো। টিক্কা খান প্রদত্ত পরিকল্পনার বিষয় হল শেখ মুজিব এবং আওয়ালী লীগ পন্থীকে নিশ্চিহ্ন করা হোক। খান শাসকমণ্ডলী ধারণা করেছিলেন যে বন্দুকের নলে ও কামানোর ফুৎকারের বাঙালি জাতিকে কয়েক মুহূর্তের মধ্যে শিমুলের তুলার ন্যায় উড়িয়ে দেবেন।^{১০} কিন্তু পাকিস্তানী জাতি বিভাগ ধারণা করতে পারেননি যে, বাঙালি দুই হাত পরিমিত বাশের লাঠির মধ্যে বৈজয়ন্তী শক্তির উপাদান কত পরিমাণ প্রচলন শক্তির আকারে নিহিত ছিল। ৭ই মার্চ শেখ মুজিবুর রহমান রাষ্ট্রনায়কোচিত জ্ঞান ও বাগিতার সেরা নিদর্শনে অস্থির জনসমুদ্রকে দীর্ঘতম মহাকাব্যের কথা স্বল্প কথায় বলেন। রমনা রেসকোর্স সমাজের সকল শ্রেণির মানুষের আগমন সত্যিকার অর্থে এক জনসমুদ্রে রূপান্তরিত হয়। মন্ত্রমুগ্ধ জনতা যেন শ্রুতি কর্তৃক প্রেরিত ত্রানকর্তার কণ্ঠস্বরটি শোনে। কণ্ঠস্বরটি বলতে থাকে। “তোমাদের যা কিছু আছে তাই নিয়ে তৈরি হও। আমি সেদিন হুকুম দেওয়ার সময় নাও পেতে পারি, তোমাদের যা কিছু আছে তাই দিয়ে শত্রুর মোকাবেলা করতে হবে। এবারের সংগ্রাম মুক্তির সংগ্রাম, এবারের সংগ্রাম স্বাধীনতার সংগ্রাম”।

পশ্চিমা শাসকমণ্ডলীর বহুদিনের পোষিত আশংকা ছিল যে, সাধারণ নির্বাচন অনুষ্ঠিত হলে বাঙালির সংখ্যাগরিষ্ঠ হয়ে যাবে। তদ্ব্যতীত বহু বছর যাবত সরকার নানা প্রকার তালবাহানা করে সময় কাটিয়ে আসছিলেন। পাকিস্তানের সাময়িক শাসকচক্র এতদিন যে, জনগনের ধর্মীয় অনুভূতিকে রাজনীতির ছাচে ঢেলে আপনাদের স্বার্থসিদ্ধির প্রয়াস পাচ্ছিলেন তা আওয়ামী লীগের স্বচ্ছ রাজনীতির প্রভাব চিরতরে নস্যাৎ হয়ে যাওয়ার সম্ভাবনা দেখা দেয়। তারা এবার প্রমাদ গুণতে শুরু করলেন। তারা প্রমাদের উন্মাদনায় রাজনীতির সুষ্ঠু পরিস্থিতির বাস্তবতা মেনে নিতে কিছুতেই রাজি হলেন না। তাই তৎকালীন সাময়িক শাসকমণ্ডলী রাজনৈতিক ঘটনা প্রবাহের প্রত্যেক ধাপে তাল বাহানা ও প্রতারণা শুরু করলেন। এতে এই প্রমাণিত হল যে, তারা কোন অবস্থাতেই পাকিস্তানের শাসনভার ও কর্তৃত্ব বাঙালিদের উপর ছেড়ে দিতে নারাজ। স্বার্থ সিদ্ধির উদ্দেশ্যে ধর্ম - নীতি ও রাজনীতির মধ্যে সমন্বয় সাধনে যে কূটবুদ্ধি খেলেছিল তা চিরতরে খসে পড়ল। অধর্মের প্রভাবে ধর্মের বন্ধন আর অক্ষুণ্ণ রাখতে পারল না। ভেদবুদ্ধি ও ভেদ- জ্ঞান এসে তাঁদের অন্তরকে কলুষিত করল। মনুষ্যত্ব বোধের বিলোপ সাধন করল।

স্মৃত্যব্য একটি জাতিকে বন্ধন, রক্ষণ ও সার্বভৌম অভ্যুদয়ের জন্য শুধু ধর্ম নয় কিংবা ধর্মের ন্যায় একটিমাত্র উপাদান যথেষ্ট নয়। এই জন্য বহু উপাদানের সম্মিলিত শক্তির প্রয়োজন। ভৌগোলিক সংস্থান, সংস্কৃতির সম্পর্ক, ইতিহাসের ক্রমঃধারা, ভাব ভাষার একত্ব ও স্বভাব চরিত্রের সামঞ্জস্য না থাকলে জগতে কোন জাতি গঠিত হতে পারে না। জুলুম ভিত্তির অযৌক্তিক কোন রাষ্ট্র ব্যবস্থা কিংবা সমাজ ব্যবস্থা সৃষ্ট হলেও জগতে তা দীর্ঘস্থায়ী হয় না। ভূগোল, ভাষা, অর্থনীতি ও সংস্কৃতির দিক দিয়ে যে ক্ষেত্রে সম্পূর্ণআলাদা দুই অঞ্চলের মধ্যে ২০০০ হাজার মাইলের ব্যবধান ঐসব যাবতীয় পার্থক্য অসীকার করে শুধু একটি মাত্র বিষয়ের উপর ভিত্তি করে এক জাতিতে পরিণত করতে যাওয়া স্বার্থ সিদ্ধির একটি বিরাট ধাপ্পা ছাড়া আর কিছু না। এ সম্পর্কে রাজনীতিজ্ঞ নেতারা যে সব ভবিষ্যদ্বাণী করে গেছেন, তাঁদের বাণী পরিণতিতে যথার্থ সত্যে বাস্তবায়িত হয়েছে। সাধারণ নির্বাচনে বিপুলভোটাধিক্যে সংখ্যা গরিষ্ঠতা অর্জনইপাকিস্তানী শাসক মন্ডলীর সকল দুর্ভাগ্যসিদ্ধি পূর্ণ উদ্দেশ্যের মূল্য কুঠারাঘাত বিবেচিত হওয়ায় তাঁরা এই সিদ্ধান্তে উপনীত হলেন যে, যে কোন উপায়ে হোক দূর ভবিষ্যতে পূর্ব পাকিস্তানকে সংখ্যালঘুতে পরিণত করে তুলতে হবে। তদ্ব্যতীত তাঁরা জাতির অগ্রবর্তী অংশ উর্বরা শক্তিসম্পন্ন মস্তিক বুদ্ধিজীবী, জাতির ভবিষ্যৎ বংশধর ছাত্র সম্প্রদায়ের ধ্বংস সাধন, নিরস্ত্র নিরীহ গণ-হত্যা এবং সংখ্যালঘু অমুসলমান সম্প্রদায়কে কাফের আখ্যা দিয়ে দেশ থেকে সমূলে উচ্ছেদ ও বিতাড়নের দূর্দৃষ্টি অভিযান শুরু করলেন। এই অভিযানে যদি নিহত ও বিতাড়িতের সংখ্যা কয়েক কোটিতে পৌঁছে যায়, তা হলেই তো পূর্ব পাকিস্তান সংখ্যালঘু অংশে উপনীত হয়ে একটি বোবা বধির ও গোলাম জাতিতে পরিণত হয়ে যাবে। চিরকালের জন্য পশ্চিম পাকিস্তানের পদানত হয়ে থাকবে। এই উদ্দেশ্যেই তারা ধ্বংস যজ্ঞের রক্তাক্ত অভিযান আরম্ভ করেছিলেন। বাঙালি জাতির শিক্ষা, সংস্কৃতি, সাহিত্য, শিল্প বাণিজ্য সব কিছু ধ্বংস করে নির্মূল করার অভিযান সুপারিকল্পিতভাবেই চালিয়ে গেলেন। জীব সৃষ্টির নীতি যতদিন জগতে বক্ষে বিদ্যমান থাকবে, ততদিন কেউ ভুলতে পারবে না যে, ১৯৭১ সনের ২৫শে মার্চ থেকে ১৬ ই ডিসেম্বর পর্যন্ত এই দুইশত ছয়ছটি রক্তাক্ত ও বিভীষিকাময় বাঙালি জীবনের দিনগুলোর কথা। বিশ্বকোষে রক্তাক্ত বর্ণমালায় তা করুণ অধ্যায়ে লিপিবদ্ধ থাকবে চিরকালের জন্য। ঐতিহাসিক ২ রা মার্চ বৃহস্পতিবার রাত্রি ১১টা থেকে রাজধানী ঢাকার বক্ষে গণ হত্যার তাণ্ডবলীলা আরম্ভ হয়। ঘুমন্ত ঢাকার উপর

আক্রমণ চালাবার জন্য সামারিক শাসকগোষ্ঠী সাজোয়া ট্যাংক গোলন্দাজ ও পদাতিক বাহিনীর তিনটি ব্যাটালিয়ান ব্যবহার করে এক লোমহর্ষক হৃদয় বিদারী ব্যাপক গণহত্যা নিযুক্ত হয়। ২৬ শে মার্চ থেকে ঢাকা শহর ত্যাগ করে লাখ লাখ মানুষ পালাতে আরম্ভ করে। ঢাকা শহরের সর্বত্র গণহত্যা, লুট- তরাজ, অত্যাচার, উৎপিড়িত, জনহিতকর, সমাজহিতকর প্রতিষ্ঠান ধ্বংস, নারী নির্যাতন আরম্ভ হয় এবং ঢাকা থেকে ক্রমশঃ মফস্বলে ছড়িয়ে পড়ে। বাংলার দিকে দিকে, শহরে বন্দরে, গ্রাম গ্রামান্তরে ধ্বংসলীলা, নিধনযজ্ঞ অবাধ গতিতে চলতে থাকে।

বিশ্ব বৌদ্ধ সৌভ্রাতৃত্ব সংঘের মাসিক পত্রিকা

বিশ্ববৌদ্ধ সৌভ্রাতৃত্ব সংঘের সদর দপ্তরে মাননীয় জ্যোতিঃপাল মহাথের তৎকালীন পূর্ব পাকিস্তানে যে ভীষণ সন্ত্রাস ও মহাদুঃখ দুর্দশার সৃষ্টি হয়েছে তা নিরসন কল্পে পাকিস্তান বৌদ্ধ কৃষ্টি প্রচার সংঘের প্রেসিডেন্ট মাননীয় জ্যোতিঃপাল ১৯৭১ সালের ১২ আগস্ট বৃহস্পতিবার ব্যাংককে এসে পৌঁছেছেন। তাঁর সঙ্গে এসেছেন একজন বিশিষ্ট বাঙালি ভদ্রলোক।^{১১}

তাঁর আগমনের পর দিন বিশ্ব বৌদ্ধ সৌভ্রাতৃত্ব সংঘের সদর দপ্তরে এসে সভানেত্রী ও সেক্রেটারী জেনারেল এর সাথে এক সৌজন্যমূলক সাক্ষাৎকারে মিলিত হন। পূর্ব পাকিস্তানে বর্তমানে যে আতংক ও দুঃখ দুর্দশা ভোগের চরম অবস্থা বিরাজমান মাননীয় জ্যোতিঃপাল মহাথের বিশ্ব বৌদ্ধ সৌভ্রাতৃত্ব সংঘের সভানেত্রী ও সেক্রেটারী জেনারেলের নিকট তা বিস্তারিত বর্ণনা দিয়েছেন। পূর্ব পাকিস্তানের জনসাধারণ যে মহাবিপদের সম্মুখীন হয়েছে তা বিশ্ব মানবের স্মরণযোগ্য কালের মধ্যে তা সর্বাধিক দুঃখপূর্ণ ঘটনার অন্যতম। বিপুল সংখ্যক বৌদ্ধজনগণ দেশত্যাগ করে ভারতে আশ্রয় নিয়েছেন এবং তিনি নিজেও ত্রিশজন ভিক্ষু শ্রামণ সহ ভারত সীমান্ত এসে পৌঁছেন। ব্যাংককে অবস্থানকালীন মাননীয় জ্যোতিঃপাল মহাথের ব্যাংককের প্রসিদ্ধ বিহার মার্বেল টেম্পলে আতিথ্য গ্রহণ করেছেন। সদ্ধর্ম প্রধান দেশের স্ব-ধর্মীয় লোকের নিকট পাকিস্তানী বৌদ্ধ শরণার্থীদের জন্য প্রয়োজনীয় সাহায্যের সন্ধানই তাঁর ভ্রমণের মুখ্য উদ্দেশ্য। মাননীয় জ্যোতিঃপাল মহাথের ১৯৭১ সনের ১৬ ই আগস্ট জাপানের উদ্দেশ্যে ব্যাংকক ত্যাগ করেন এবং সেই মাসেই ২২ তারিখ নয়াদিল্লী প্রত্যাবর্তন করেন। তাঁর এই ভ্রমণের খরচ বহন করেন তাঁর আচার্য ও সহগামী মুসলিম বন্ধু। মাননীয় জ্যোতিঃপাল মহাথের বললেন যে, ভারতের আগরতলায় প্রাচ্যবিদ্যা বিহারে তিনি অবস্থান করবেন। বিশ্ববৌদ্ধ সৌভ্রাতৃত্ব সংঘের প্রকাশিত এই মাসিক পত্রিকাটি থাইল্যান্ডে ও বিশ্বের সর্বত্র প্রেরিত ও প্রচারিত হওয়ায় বাংলাদেশের স্বপক্ষে আমাদের বিশ্ব জনমত সংগঠন এবং স্বীকৃতি লাভের সন্ধান সর্বাধিক গুরুত্বপূর্ণ সাফল্য লাভ করেছে। পণ্ডিত জ্যোতিঃপাল মহাথেরো আরো বলেন, তাই বলি কলম্বো বা টোকিওতে আমাদের যেকর্ম তৎপরতা সম্পাদিত হয়েছে তা সেই সেই দেশের অভ্যন্তরের সীমাবদ্ধ রয়েছে, কিন্তু ব্যাংককের ব্যাপক তৎপরতা বিশ্বের সকল দেশে প্রচারিত হয়ে আন্তর্জাতিক ক্ষেত্রে বিরাট ভূমিকা পালন করেছে। তাতে বৌদ্ধ জগতে ভীষণ আলোড়নের সৃষ্টি হয়। বিশেষত বিশ্ব বৌদ্ধ সৌভ্রাতৃত্ব সংঘের সভানেত্রী রাজকুমারী পুনপিসমাই দিঙ্কুল পাকিস্তানের প্রেসিডেন্ট আগা মোহাম্মদ ইয়াহিয়া খান, থাইল্যান্ডে পাকিস্তানী রাষ্ট্রদূত এবং বিশ্ব রাষ্ট্র সংঘের সেক্রেটারী জেনারেল উঃ থান্টের নিকট পত্রের আদান প্রদানের মাধ্যমে চাপ সৃষ্টি করেন। পাকিস্তানী বৌদ্ধদের নিরাপত্তা বিধানের জন্য বিশ্বের কতিপয় বৌদ্ধ বিশিষ্ট রাষ্ট্র থেকেও পাকিস্তানী সরকারের উপর চাপ সৃষ্টি করা হয়। যার ফলে পাকিস্তান সরকার বৌদ্ধদের নিরাপত্তার জন্য পরিচয় পত্রের প্রচলন করেছিলেন। এই পরিচয় পত্রের মাধ্যমে স্বার্থান্বেষী লোকেরা বহু অর্থ উপার্জন করেছে। বহু অবৌদ্ধকে বৌদ্ধ বলে পরিচয় দিতে গিয়ে অর্থাগমের পথ সুগম করেছে মাত্র। চিন্তাশীল লোক মাত্রই উপলব্ধি করতে সক্ষম হবেন যে একটা আন্তর্জাতিক আন্দোলন ব্যতিরেকে পাকিস্তান সরকার চার সম্প্রদায়ের অধ্যুষিত রাষ্ট্রে শুধু একটি বিশেষ সম্প্রদায়ের জন্য কি দয়ায় পড়েই তৎপর হয়েছিলেন- না দায়েপড়ে করেছিলেন।

নয়াদিল্লীতে আন্তর্জাতিক সম্মেলনে যোগদান

পণ্ডিত জ্যোতিঃপাল মহাথের রচিত ‘বাংলাদেশ মুক্তি সংগ্রামে’ বইতে ভারতের নয়াদিল্লীতে অনুষ্ঠিত আন্তর্জাতিক সম্মেলনে যোগদান করার পেক্ষাপট তুলে ধরেন উক্ত বইতে। তিনি বলেন, ১৯৭১ সনের সেপ্টেম্বর মাসের ১৮, ১৯ ও ২০ তারিখে নয়াদিল্লীতে তিনদিন ব্যাপী অনুষ্ঠিত আন্তর্জাতিক সম্মেলনে আমি বাংলাদেশের পক্ষে প্রতিনিধি হিসাবে আমন্ত্রণ পেয়ে অংশগ্রহণ করেছি। এবং বিভিন্ন আলোচনায় যোগ দিয়েছি। এই সম্মেলনে বিশ্বের ৩১ টি রাজ্যের প্রতিনিধি অংশগ্রহণ করেছিলেন। বাংলাদেশ প্রতিনিধি দলের নেতা ছিলেন চট্টগাম বিশ্ববিদ্যালয়ের উপাচার্য ও পরবর্তীকালে নয়াদিল্লীতে বাংলাদেশের হাই কমিশনার ডক্টর এ আর মল্লিক। বাংলার বিখ্যাত মনীষী সৈয়দ আলী আহসান ছিলেন প্রতিনিধি দলের অন্যতম সদস্য। প্রতিদিন এই সম্মেলনের সভাপতিত্ব করেছিলেন ভারতের সর্বোদয় নেতা শ্রীজয় প্রকাশ নারায়ণ। তিনিই এই সম্মেলনের প্রধান উদ্যোক্তা। সম্মেলনের প্রথম দিন সর্ব প্রথম বক্তা ছিলেন ডক্টর মল্লিক। অধিকৃত বাংলাদেশ সম্পর্কে বিশ্বের প্রতিনিধি বর্গের সম্মুখে বিরাট জনাকীর্ণ সমাবেশে ড. মল্লিক দীর্ঘ এক ঘণ্টা যাবত যে মর্মস্পর্শী সারগর্ভ বক্তৃতা প্রদান করলেন তাতে বাংলাদেশের পূর্ণাঙ্গ চিত্র সভাগৃহে দর্পণের ন্যায় তুলে ধরা হয়েছে। তার

বক্তৃতার পর সভাগৃহ স্তম্ভিত ও পাকিস্তানের বিরুদ্ধে ধিক্কার ধ্বনিতে সোচ্চার হয়ে উঠে। ১৯শে সেপ্টেম্বর রবিবার সভার পরে এক ঘরোয়া বৈঠকে The World Conference of Religion for Peace এর সেক্রেটারী জেনারেল ড. হোমার জ্যাকের সাথে আমি মিলিত হয়ে বাংলাদেশ সম্পর্কে দীর্ঘ আলোচনায় ব্যাপ্ত হই।^{১২}

এসব আলোচনার ভিত্তিতে তিনি অধিকৃত বাংলাদেশের বৌদ্ধদের মর্মান্তিক অবস্থা সম্পর্কে দৃঢ় মত প্রকাশ করেন। বাংলাদেশ সংক্রান্ত এই আন্তর্জাতিক সম্মেলনে বিভিন্ন বৌদ্ধ রাষ্ট্র থেকে যে সকল প্রতিনিধি যোগ দিয়েছিলেন, আমি তাদের সবাইকে আমন্ত্রণ করে দিল্লী জগজ্যোতি বিহারে নিয়ে যাই এবং বৌদ্ধ ও অন্যের উপর পাক হানাদার বাহিনীর নৃশংসতা সম্পর্কে বিশেষভাবে আলোচনা করি। এই বৈঠকে নেতৃত্ব করেছেন সিংহলের যোগাযোগ মন্ত্রী ও Ceylon Committee for human rights in East Bengal এর চেয়ারম্যান মিঃ সেনাপথ গুন বর্দন ও টোকিও বিশ্ববিদ্যালয়ের অধ্যাপক ও Bangladesh Liberation Committee এর চেয়ারম্যান ড. টি নারা। জগজ্যোতি বিহারের অধ্যক্ষ আয়ুস্মান শ্রী ধর্মবিরিয়ো অভ্যাগত প্রতিনিধিগণকে মিষ্টি, নানা প্রকার সুস্বাদু ফল ও চা চক্রে আপ্যায়িত করেন। আন্তর্জাতিক এই মহা সম্মেলন সমাপ্ত হওয়ার পর আয়ুস্মান শ্রীধর্ম বিরিয়োর সৌজন্যে ও সহযোগীতায় আমি ভারতীয় সাহায্যে পূর্ববাসন মন্ত্রী মাননীয় আর, কে খাদিল করের সাথে কয়েকবার সাক্ষাৎ করি। এই সাক্ষাৎকারের উদ্দেশ্য হলো আগারতলায় যেসব শরণার্থী ভিক্ষু শ্রামণ আছেন, সোজা সরল কথায় বলতে গেলে তারা আহায়ে বিহারে রীতিমত কষ্টে আছেন। মিঃ খাদিলকর সাহেবের অনুগ্রহ লাভে তাদের কষ্টের কিছু লাঘব করা সম্ভব এই উদ্দেশ্যে আয়ুস্মান ধর্ম বিরিয়োর চেষ্টা যত্নে মিঃ খাদিলকর আগারতলায় শরণার্থী ভিক্ষু শ্রামণগণের জন্য এগারো হাজার সাতশত টাকা মঞ্জুর করে পাঠান। এই মঞ্জুরীকৃত টাকা আমাকে দেওয়া হবে আগারতলা সাহায্য পূর্ববাসন তহবিল থেকে। তাই আমার আগারতলার পৌছানো প্রয়োজন। অতঃপর আমি আগরতলা ফিরে যাওয়ার ইচ্ছা প্রকাশ করলে বাংলাদেশ মিশন আমাকে কলকাতা হয়ে আগরতলা পৌছানোর জন্য বিমানের টিকেট ক্রয় করে দিলেন। টিকেট পাওয়ার পর হঠাৎ মাথায় আরেক বুদ্ধি চাপল। সহসা কি আবার দিল্লী আসতে পারব? দিল্লী আসতে পারব? দিল্লীর আশে পাশে যত তীর্থস্থান, যত সংস্কৃতি ও ঐতিহ্যবাহী প্রতিষ্ঠান, নয়নাভিরাম দর্শনীয় বস্তু আছে, একেবারে কিছু না দেখে সরাসরি আকাশ মার্গে উড়ে চলে যাওয়া কিছুতেই উচিত হবে না। আশুত কিছু দেখে যাওয়া দরকার। এই সিদ্ধান্ত বিমানের টিকেট বাতিল করে ৪৫০ টাকা পেলাম। তাতে আত্মার তাজমহল, হুমাঈন কেলা, ময়ূর সিংহাসন, জামে মসজিদ, দিওয়ান- ই খাম প্রভৃতি মোগল যুগের পুরাকীর্তি ও মথুরা বৃন্দাবন, গোকুল প্রভৃতি তীর্থস্থান দর্শন করলাম। আরো উল্লেখ্যাকার প্রয়োজন যে, দিল্লীতে প্রতিষ্ঠিত কুর্বাতুল ইসলাম মসজিদ, ইসলামী স্থাপত্য বিদ্যার এক উল্লেখযোগ্য নির্দশন এবং সারা মুসলিম জাহানে গৌরবের বস্তু। এটার প্রতিষ্ঠাতা আইবক ছিলেন প্রথম সুলতান। পরবর্তীকালে ইন কুবুমিন ও আলা উদ্দিন এই মসজিদের সম্প্রসারণ করেন। ২৩৪ ফুট উচ্চ কুতুব মিনার ইসলামের আধিপত্য প্রভাবের বার্তা আজও বহন করছে। আজমীরের আড়াই দিনকা ঝোপড়া কুতুবুদ্দিন ও ইল তুত মিসের শিল্পপ্রীতি অন্যতম বিখ্যাত নির্দশন। খলজি যুগে মুসলিম স্থাপত্য শিল্পের অন্যতম বিখ্যাত নির্দশন হলো আলাউদ্দিনের নির্মিত আলাই দারুয়াজা হুমাঈন মসজিদ প্রভৃতি। গান্ধী পার্ক, গান্ধী ও নেহেরুর শাশান, নেহেরু যাদুঘর, বিরলা মন্দির, লাদাক বৌদ্ধ বিহার, লাল কেলা প্রভৃতি প্রতিষ্ঠান দিল্লীতে অবস্থান কালে অবস্থানকালে এসব কীর্তি ফাকে ফাকে দর্শন করেছি। বৌদ্ধ জগতে শ্রী সত্য নারায়ণ গোয়েঙ্কা একজন বৌদ্ধধর্মে সিদ্ধাচার্য, বিদর্শন ভাবনা গুরু। তাঁর পূর্ব পুরুষের বাসভূমি হচ্ছে বোম্বে। তার পিতা ব্যবসায় বাণিজ্য উপলক্ষে বার্মায় গিয়ে বহুকাল অতিবাহিত করেছিলেন। গোয়েঙ্কাজীর জন্মস্থান বার্মাদেশে। তিনি ছোট বেলা থেকে শিরপীড়ায় ভূগতেছিলেন। তার অর্থাভাব মোটোই ছিলনা। তিনি শিরপীড়া আরোগ্যকল্পে পৃথিবীর কোন দেশের কোন ডাক্তার বাকী রাখেননি। কিন্তু শিরপীড়া কিছুতেই নিরসিত হলনা। অবশেষে বার্মাদেশে ফিরে এসে তার এক বিশিষ্ট বন্ধুর পরামর্শে বৌদ্ধ সাধনার শ্রেষ্ঠ পদ্ধতি বিদর্শন ভাবনায় নিরত হলেন। এই বিদর্শন সাধনার প্রভাবে তিনি পারমার্থিক জ্ঞান লাভ করলেন। সাথে সাথে আজীবন দুভোগ্যে শিরপীড়াও চিরতরে উপশমিত হয়ে গেল। তিনি নবজীবন লাভ করলেন। বর্তমানে তিনি বোম্বাই প্রদেশের অন্তর্গত ইগতপুর নামক এক পাহাড়ে এক বিদর্শন ভাবনা কেন্দ্র প্রতিষ্ঠা করেন। এই কেন্দ্র বিশ্বের সকল সম্প্রদায়ের লোক সমবেত হন এবং বিদর্শন অনুশীলন করে আত্ম বিশুদ্ধি ও জীবন মুক্তি লাভ করেন। প্রতিদিন বিশ্বের তিন শতাধিক লোক তার কেন্দ্রে অনুশীলন রত থাকেন।

দিল্লী অবস্থানকালে আমি তার পবিত্র সান্নিধ্য লাভ পরম সৌভাগ্যশালী হতে সক্ষম হয়েছিলেন। একদিন সন্তনগনের জগজ্যোতি বিহার প্রাঙ্গণে দ্বিতীয় রেল স্টেশনের বিশ্রামাগারে। উভয় দিনই তিনি বিদর্শন ভাবনা সম্পর্কে অমৃতবারি বর্ষণ করলেন। তার সুমধুর ভাষন শ্রবণে জীবন ধন্য করলাম।

অতঃপর দিল্লী ত্যাগ করে গয়া কাশীর উদ্দেশ্যে রওনা হব। এমন সময় ফররুকাবাদ জিলার নিবকরোবি থেকে এক নিমন্ত্রণ পত্র পেলাম। পত্র লেখক হচ্ছে শ্রী শিমুল কান্তি বড়ুয়া। তিনি সেখানকার বৈদ্যুতিক ফার্মে বহুদিন ধরে কাজ করে আসছেন। নিবকরোরি হচ্ছে দিল্লী ও গায়ার ঠিক মাঝামাঝি পথে অবস্থিত। আরো আনন্দের কথা হলো নিবকরোরির পাশেই বৌদ্ধযুগের শাঙ্কাস্য নগর

সেখানে এখানো বৌদ্ধ স্তূপ মন্দির ইত্যাদি দর্শনীয় বস্তু ও তথ্যগতের অনন্ত গুনাবলী স্মরণ পূজা করার অনেক উল্লেখযোগ্য নির্দর্শন রয়েছে ।

২৭ শে সেপ্টেম্বর সোমবার বিশ্বশান্তি স্তূপ দর্শন করতে গিয়ে লক্ষ্য করলাম এই স্তূপ অর্পণ প্রাচীন বৌদ্ধ যুগের চারু শিল্প কারু শিল্প এবং বর্তমান যুগের অভিনব আধুনিকতার অর্পণ সমন্বয় রাজগৃহের এই বিশ্বশান্তি স্তূপ । এটা রাজগৃহের সর্বোচ্চ পর্বত শীর্ষে অবস্থিত । এই স্তূপ দর্শনের জন্য পর্বত শীর্ষে উঠার যে বিদ্যুৎ চালিত পদ্ধতি তাও ভারতবর্ষে একান্ত অভিনব ও অদ্বিতীয় । মালয়েশিয়ার কুয়ালালামপুরে দেখেছি বিদ্যুৎ চালিত সিঁড়ি । পিনাঙ্গে দেখেছি পর্বত শীর্ষে আরোহণ করার বিদ্যুৎ চালিত রেলগাড়ী আর রাজগৃহে দেখলাম বৈদ্যুতিক তারে ঝুলানো যাত্রীবাহী চেয়ার । পণ্ডিতআনন্দমিত্র মহাস্থবির ও আমি পর্বত পাদদেশে পাশাপাশি দুটো চেয়ারে বসে পড়লাম । চেয়ারগুলো তাদের ক্ষুদ্র ক্ষুদ্র কুম্ভিতে ধারণ করে আমাদেরকে পর্বত শীর্ষে বিশ্বশান্তি স্তূপের প্রাঙ্গণে নিয়ে পৌঁছিয়ে দিল । বিশ্বশান্তি স্তূপের সম্মুখে উপস্থিত হওয়া মাত্রাই চক্ষুস্থির হয়ে গেল । এই নমুনার বৌদ্ধ স্তূপ সিংহল, বার্মা, থাইল্যান্ড, কম্বোডিয়া প্রভৃতি বৌদ্ধ প্রধান দেশে এরূপ রাশি রাশি স্তূপ দেখতে পাওয়া যায় । ভারতের বৌদ্ধ যুগের এরূপ স্তূপের অভাব ছিল না । কিন্তু আজ ভারত বাংলায় এই পদ্ধতির কোন স্তূপ দৃষ্টি গোচর হয় না । আমি বিশ্বশান্তি স্তূপটি তিনবার প্রদর্শন করে তথাগত বুদ্ধের অনন্ত গুণাবলীর কথা স্মরণ পূর্বক ভক্তি প্রণতঃ শিরে অভিবাদন করে ও অধিকৃত বাংলাদেশের আশু মুক্তি ও সাম্য শান্তির কল্পনায় প্রার্থনা জানাই । স্তূপ দর্শন করে আমরা বিদ্যুৎ চালিত চেয়ারে আর অবতরণ করলাম না । কৌতূহল বলে অবতরণ করলাম পর্বত গায়ে নব নির্মিত স্থাপত্য সিঁড়ি বেয়ে । অবতরণকালে সিঁড়ির পাশে গৃহকূট পর্বত দৃষ্টি গোচরে এলো যেখানে একদা মহাকাব্যিক তথাগত বুদ্ধ অবস্থান করেছিলেন । সন্ধ্যার প্রাক্কালে গয়ার থাই বিহরের অধ্যক্ষ রাজগৃহ থেকে ফেরার পথে আমরা তার সাথে সেই দিনই বুদ্ধ গয়ায় প্রত্যাবর্তন করি ।

ঐতিহাসিক আগরতলায় আগমন

আগরতলা যাওয়ার প্রসঙ্গে পণ্ডিত জ্যোতিঃপাল মহাথেরো বলেন, ৮ই অক্টোবর শুক্রবার আমি আগারতলার উদ্দেশ্যে কলকাতা ত্যাগ করি । বিমান আমাদেরকে বক্ষে ধারণ করে দৈত্যগতিতে উড়ে এসে গৌহাটিতে অবতরণ করল । তারপর বিমানের ইঞ্জিনে গোল যোগ লেগে যাওয়ার সেদিন আর আগারতলা পৌঁছা গেলনা । এক রাত্রি গৌহাটি থাকতে হয়েছে । পরদিন সকাল ১১ টায় আগরতলায় পৌঁছলাম ।

আগারতলা বেণুবন বিহারে যে সব, শরণার্থী ভিক্ষু শ্রাবণ ছিলেন, তাদের সাথে সাক্ষাৎ করে তাদের সুখ দুঃখের খবর নিলাম । বাংলাদেশ মিশনের কর্মকর্তা জনাব জহুর আহম্মদ চৌধুরী, জনাব আকবর আলী খান ও ড.হোসেন সাহেবের সাথে সাক্ষাৎ করে বিদেশে আমাদের কর্ম তৎপরতা সম্পর্কে আলোচনা করি ।

ত্রিপুরা রাজ্যের বিভিন্ন শরণার্থী শিবির থেকে সমস্ত বৌদ্ধ শরণার্থীগণকে যে তোতা বাড়ী শিবিরে স্থানান্তরিত করা হয়েছিল- তাদের খবর নিতে গিয়ে বড়ই মর্মান্বিত হলাম । শরণার্থী পরিবারের মধ্যে খুব কম পরিবারই আছে যে পরিবার মাতা বা পিতাকে ভাই বা বোনকে, ছেলে বা মেয়েকে না হারিয়েছে । কোন কোন পরিবার একেবাবে উচ্ছিন্ন হয়ে গিয়েছে । আরো মর্মঘাতী খবর পেলাম বাংলাদেশ থেকেবাংলাদেশস্থ বরইগাঁও গ্রামে আমার প্রতিষ্ঠিত ও পরিচালিত প্রতিষ্ঠান সমূহ লুণ্ঠিত, আসবাব পত্র অপহৃত, লাইব্রেরীর শতশত বই পুস্তক অগ্নিসংযোগে ভস্মীভূত ।

আগারতলা কয়েকদিন অবস্থানের পর আমার শিষ্য সেবক নিয়ে আমি চলে গেলাম নব প্রতিষ্ঠিত “আগারতলা বৌদ্ধ মিশনে” যা বিদেশ গমনের পূর্বে জায়গা খরিদ করে একটি বুদ্ধ মন্ডপও ভিক্ষুদের জন্য একটি বাসগৃহ নির্মাণ করে একজন বুড়ো শিষ্যকে রেখে গিয়েছিলাম সেই আমতলী সূর্যমনি নগরে । এই নব নির্মিত আশ্রমের নাম করণ হয়েছে “আগতলার বৌদ্ধ মিশন” । এটার সংস্থিত স্থানটি আগরতলা থেকে তিন মাইল ব্যবধানে দক্ষিণগামী রোডের পূর্বধারে অতি সন্নিকটে অবস্থিত । এরপ্রাকৃতিক দৃশ্য অতীব মনোরম । এখান থেকে আগারতলা যাতায়াতের উত্তম ব্যবস্থা । প্রতি ২/৪ মিনিট পরপর বাস সার্ভিস দক্ষিণ ত্রিপুরার সাথে যোগাযোগ রক্ষা করে চলেছে । আমতলী বাজার পর্যন্ত টাউন সার্ভিস বাস । হাইস্কুল, জুনিয়ার হাই স্কুল, পোস্ট অফিস, হাটবাজার যোগাযোগ ব্যবস্থা ইত্যাদি সকল প্রকার সুযোগ সুবিধা করেই এই স্থান পছন্দ করেছি ভবিষ্যতে অনেক আশা আকঙ্কায় ।

এখানে আমি শিষ্য সেবক নিয়ে দিনগুলো অতিবাহিত করেছি । উত্তর পার্শ্বে টিলায় ছয় হাজার শরণার্থী অধ্যুষিত বিরাট শিবির । দক্ষিণ ও পশ্চিম পার্শ্বে স্থায়ী বাসিন্দা লোকজনের বাস । দিনরাত আমার আশ্রমে ভক্ত সমাগম । মাঝে মাঝে ভক্তবৃন্দের মনো বিনোদনকল্পে শাস্ত্র পাঠ ধর্মালোচনা হত । ভক্ত বৃন্দের মধ্যে শ্রী পরেশ নাথ আচার্য্য তার সহধর্মিনী শ্রীমতি শান্তি বালা আচার্যের নাম বিশেষভাবে উল্লেখযোগ্য তারাশুধু ধর্ম ভক্তির পরিচয়ই দেননি, আমার প্রাত্যাহিক জীবন জীবিকা নির্বাহের তত্ত্বাবধানও করতেন । তাদের, স্নেহ-মমতা ও শ্রদ্ধা ভক্তির কথা আমি জীবনও ভুলতে পারব না । ভুললে আমার জীবনই মিথ্যা হয়ে যাবে । এরূপে অল্প কিছুদিনের মধ্যে

আশ্রমের প্রতি স্থানীয় জন সাধারণ ও সরকারের শুভ দৃষ্টি আকৃষ্ট হয়েছিল তাতে মনে হয়েছিল যে, আশ্রমের ভবিষ্যৎ অতিশয় সমৃদ্ধ।^{১০}

বাংলাদেশ মুক্তি সংগ্রামে আমার হিন্দু মুসলিম বৌদ্ধ বহু সংখ্যক ছাত্র মুক্তিযোদ্ধারূপে যোগ দিয়েছিলেন। তারা বাংলাদেশের বিভিন্ন অঞ্চলে বিভিন্ন সময়ে যুদ্ধে অবতীর্ণ হয়েছেন। তাদের কেউ সুস্থ দেহে কেউবা জীবন্তে মৃত প্রায় হয়ে ফিরে এসেছেন। আর কেউ বা ফিরে আসেন নি। মাতৃভূমির উদ্ধারকল্পে চিরতরে অনন্তে বিলীন হয়ে গেছেন। তারা সবাই যুদ্ধে নামবার প্রাক্কালে দোয়া দাখ্যনের সন্ধানে আমার নিকট উপস্থিত হতেন। আমি তাদেরকে বাংলাদেশের আর্দশ, স্বাধীনতার মহাত্ম্য, দেশাত্মবোধ এবং পরাধীন জীবনের দুর্বিসহ দুঃখ অশান্তি সম্পর্কে নানাভাবে উৎসাহিত, অনুপ্রানিত, ও উদ্দীপিত করেছি। এতে তারা খুব আনন্দ ও গৌরববোধ করতেন। নভেম্বর প্রায় শেষ। বাংলাদেশ ও ত্রিপুরা রাজ্যের সীমান্তে প্রায়দিনই গোলাগুলির শব্দ শোনা যায় তাতে মানুষের অন্তর সন্ত্রস্ত। এদিকে দেখা যায় আগারতলা থেকে দক্ষিণ ত্রিপুরায় যোগাযোগ রক্ষাকারী রজিপদটি অহরহঃ ব্যস্ত। সামরিক অস্ত্রশস্ত্র নিয়ে পিপাঁড়ার মত অসংখ্য যান বাহনের ক্ষণে ক্ষণে আনাগোনা। এক মিনিটের জন্য ফাক নেই বিশ্রাম নেই। যানবাহনের অবিরাম যাতায়াতের দাপটে মুহূর্মূহ কর্ণ বিদায়ী বিকট শব্দে অতিষ্ঠ হয়েযেতাম। এতে অনুমান করা অযৌক্তিক হয়নি যে আগামী কয়েকদিনের মধ্যে মুক্তিযোদ্ধা ও ভারতীয় সৈন্যের সম্মিলিত বাহিনী যুদ্ধে অবতীর্ণ হতে পারেন। এরূপে কয়েকদিন চললো আকাশ বানীর মারফত হঠাৎ শুনতে পেলাম ডিসেম্বর মাসের ১লা তারিখ বৌদ্ধ রাষ্ট্র ভূটান সর্ব প্রথম বাংলাদেশকে স্বীকৃতি প্রদান করল। তৎপূর্বে ব্যাংকক থাকাকালিন ভূটান ব্যাংককে আমাকে ধন্যবাদ ও কৃতজ্ঞতা জানিয়ে পত্র দিয়েছিলেন। ডিসেম্বর মাসের তিন তারিখ পাকিস্তান ভারত আক্রমণ করেছে। অমনি ৫ই ডিসেম্বর মধ্যরাত্রি ভারত। আনুষ্ঠানিকভাবে বাংলাদেশকে স্বীকৃতি প্রদান করলেন। তারপর থেকে মুক্তিযোদ্ধা ও মিত্রবাহিনী উভয়ের যৌথ উদ্যোগে ও সহযোগিতায় যুদ্ধ শুরু হয়ে গেলো। মাত্র দশ দিনের যুদ্ধে পাকিস্তানী বাহিনী পরাজয় বরণ করতে বাধ্য হয়। ১৬ ই ডিসেম্বর পাক বাহিনী পরাজয়ের মর্মবেদনা চরম পর্যায়ে পড়ে ঢাকায় আত্মসমর্পণ করে। তস্থবনে বাঙালিজাতি ও ভারতবাসী আনন্দে আত্মহারা হয়ে পড়ে।

জাতিরজনক বঙ্গবন্ধুর দর্শন মানসে

‘বাংলাদেশ মুক্তিসংগ্রাম’ বইতে পণ্ডিত জ্যোতিপাল মহাথের বলেন, জাতির জনক বঙ্গবন্ধু শেখ মুজিবুর রহমান ১০ ই জানুয়ারি সোমবার বেলা ৪ টার সময় ঢাকা সে পৌঁছবেন। আমি ১০ তারিখ ভোর ৬ টায় ঢাকার উদ্দেশ্যে বরইগাঁও ত্যাগ করি। আমার সঙ্গে আছেন রাঙ্গামাটির ভিক্ষু অমৃতানন্দ। চাঁদপুর থেকে ঢাকাগামী লঞ্চ ৮/৯ মাইল চলার পর হঠাৎ এক জাগায় থেমে গেল। লঞ্চের ইঞ্জিনে কি একটা গোলযোগ লেগে যাওয়ায় লঞ্চ আর অগ্রসর হলো না। জানতে পারলাম লঞ্চ আর চলবে না। ইঞ্জিন নষ্ট হয়ে গিয়েছে। এখান থেকে দশানী মোহনপুর অবতরণ করলাম। মোহনপুর হাই স্কুলে আমার ছোট ভাই শ্রী ধীর সেন সিংহ বি এস সি শিক্ষকতার কাজ করে। স্কুলের হেড মাস্টার শ্রী নারায়ণ দাস আমার পরিচিত আত্মীয়। আমি যখন হেড মাস্টারের বাসায় গিয়ে পৌঁছি তখন বেলা একটা। ঘন্টা খানের পরেই হেড মাস্টার মহাশয়ের ট্রানজিস্টরটি উদ্ধোধন করে সামনে অনুক্ষণ ধরে রাখলাম। মোহনপুর বসেই বিমান বন্দরে বঙ্গবন্ধুর আগমনী খবর, বিমান থেকে অবতরণ ট্রাকে করে পল্টন ময়দানে শোভা যাত্রা সহকারে অগমণ, জনসভায় কর্মসূচী ও বঙ্গবন্ধুর ও জন্মিনী ভাষায় অশ্রুমুখী অভিভাষণ সব শুনলাম। তার আবেগপূর্ণ ভাষণ শ্রবণে আমি অত্যন্ত অভিভূত হয়ে পড়লাম।

সকরণকণ্ঠে তিনি কবিগুরুর কবিতা আবৃত্তি করলেন।

নমো নমো নমঃ সুন্দরী মম, জননী বঙ্গভূমি

গঙ্গার তীর শ্লিষ্ট সমীর, জীবন জুড়ালে তুমি^{১১}

উপসংহারে বললেন- আজ আর বক্তৃতা নয়। বল নেই কয়েকদিন খাওয়া দাওয়া করে বক্তৃতা পরে দিব। তখন আমি সংবেগ সংবরণ করতে পারিনি। চোখের দুই কোঠায় সজোরে অশ্রু ভেসে উঠল। কতক্ষণ পরে কিছুটা সান্তনা বোধ করলাম।

সেই রাত্রি মোহনপুরে যাপন করে পরদিন আমি ঢাকা চলে যাই। ১২ই জানুয়ারি সকাল ৮ টায় সময় ধানমন্ডির ১৮ নং রোডস্থ বঙ্গবন্ধুর বাসভবনে গিয়ে তার সাথে মিলিত হলাম। আমার সঙ্গে ছিলেন বাংলাদেশ বৌদ্ধ কৃষ্টি প্রচার সংঘের সাধারণ সম্পাদক মিঃ ডি.পি বড়ুয়া এবং ভিক্ষু অমৃতানন্দ। আমি যখন বঙ্গবন্ধুর সামনে গিয়ে দাড়ালাম তখন আমার এক পার্শ্বে বঙ্গবন্ধুর তদানীন্তন প্রেস সেক্রেটারী জনাব আমিনুল হক বাদশা ও আরেক পার্শ্বে বঙ্গবন্ধুর মুজিব নগরে পরিচিত একজন বন্ধু। জনাব বাদশা বঙ্গবন্ধুর কাছে আমাকে পরিচয় করিয়ে দিলেন এবং বাংলাদেশ আন্দোলনে আমার ভূমিকা সম্পর্কে বলতে আরম্ভ করলেন। তখন বঙ্গবন্ধু আমাকে বক্ষে জড়িয়ে ধরলেন। আমিও তাকে জড়িয়ে ধরলাম এবং বললাম না না আমি বাংলাদেশের জন্য কিছু করতে পারিনি, তবে দেশ বিদেশ গিয়ে মানুষের কাছে বাংলাদেশের জন্য কেঁদেছি। তিনি আমার কথায় খুব আনন্দবোধ ও বিশ্বাস প্রকাশ করলেন। কিছুক্ষণ পরে আমাকে ছেড়ে অন্যান্য দর্শন প্রার্থী লোকের প্রতি মনোনিবেশ করলে তাঁর বাসভবন ত্যাগ করে চলে আসি।

সারাদিন আমি প্রচার সংঘের সাধারণ সম্পাদক মিঃ ডি.পি. বড়ুয়ার পরামর্শে তার বাস ভবনে বসে বসে বিদেশে আমার কর্মতৎপরতা সম্পর্কে একটা রিপোর্ট তৈয়ার করতে লাগলাম। সন্ধ্যার সময় মিঃ বড়ুয়া হঠাৎ বাসায় এসে আমাকে বললেন ভক্ত আপনাকে এক্ষণি ঢাকা বেতারকেন্দ্র বেতারে ত্রিপিটক পাঠের এক প্রোগ্রাম করতে হবে। এই বলে তিনি আমাকে নিয়ে ছুটলেন বেতার কেন্দ্রে। বেতার কেন্দ্র উপস্থিত হওয়া মাত্রই আমাকে পাঁচ মিনিটের এক লেখা তৈরি করে মাইক্রোফোনে পাঠ করতে হলো। এতে প্রোগ্রাম সংগঠকগণ সন্তুষ্ট হলেন। সেইদিন হতে ঢাকা বেতার কেন্দ্রে ত্রিপিটক পাঠের সম্পূর্ণ দায়িত্ব আমার উপর ন্যস্ত করা হয়। আমি প্রতিদিন সকাল সাড়ে ৬ টায় উদ্বোধনী অনুষ্ঠানে বৌদ্ধধর্ম গ্রন্থ ত্রিপিটক থেকে সত্যের চিরন্তনী বাণী প্রচার করতে থাকি। স্বাধীনতা উত্তর বাংলাদেশের ধর্ম নিরপেক্ষ সমাজ ব্যবস্থায় প্রতিদিন সকালে পবিত্র কোরান, ত্রিপিটক, গীতা ও বাইবেল এই চার ধর্মগ্রন্থ থেকে শ্রোতাদের জন্য বানী চিরন্তনী প্রচারিত হয়।

বাংলাদেশ টেলিভিশন থেকে অনুরোধ আসে আমি সেখানেও যেন ত্রিপিটক পাঠ আরম্ভ করি। টেলিভিশনে ত্রিপিটক পাঠ কয়েকমাস চলতে থাকে। এরপর টেলিভিশনে প্রোগ্রাম চালানো আমার পক্ষে সম্ভব হলো না। আমি মাসের অধিকাংশ সময় মফঃস্বলে কাটাই। কাজেই কর্মকর্তারা টি. ভি. প্রোগ্রাম অন্যান্য লোকজন দ্বারা চালিয়ে নিয়ে থাকেন।

মুক্তিযুদ্ধে সংঘনায়ক বিশুদ্ধানন্দ মহাথেরের ভূমিকা

১৯০৯ সালে ২৩ ফেব্রুয়ারী চট্টগ্রামের রাউজান থানার পূর্ব গুজরা হোয়ারাপাড়া গ্রামে জন্ম গ্রহণ করেন বিশুদ্ধানন্দ মহাথের। মহামান্য সংঘনায়ক বিশুদ্ধানন্দ মহাথের ১৯২৫ সালে তিনি প্রব্রজিত হন, এবং ১৯৩০ সালে ভিক্ষু হিসেবে উপসম্পাদা লাভ করেন। প্রথমে নোয়াপাড়া পরে মহামুনি হাই স্কুলে স্কুলজীবনের শিক্ষা সমাপ্ত করে তিনি ১৯৩৪ সালে বৌদ্ধ ধর্ম ও দর্শনে উচ্চ শিক্ষার জন্য শ্রীলংকার বিদ্যালংকার বিশ্ববিদ্যালয়ে যোগদান করেন এবং ১৯৩৭ সালে ঐ বিশ্ববিদ্যালয় থেকে শ্রী সদ্ধর্মভানক উপাধি লাভ করেন। ১৯৪৪ সালে অগ্রসর বৌদ্ধ অনাথালয় প্রতিষ্ঠার মাধ্যমে তিনি সমাজ কর্মে আত্মনিয়োগ করেন। ১৯৪৯ সালে বাংলাদেশ বৌদ্ধ কৃষ্টি প্রচার সংঘের প্রতিষ্ঠায় তিনি অগ্রণী ভূমিকা পালন করেন। তিনি ১৯৫০ সালে সংঘের প্রথম নির্বাচিত প্রতিষ্ঠাতা সভাপতি পদে অধিষ্ঠিত হন এবং সেই থেকে আমৃত্যু সংঘের সভাপতির পদ অলংকিত করেছেন। এই সংঘের মাধ্যমে তিনি বৌদ্ধদের সামগ্রিক অগ্রগতিতে নিরলস গৌরবদীপ্ত ভূমিকা পালন করেন। তাঁর জীবনের স্মরণীয় কীর্তির মধ্যে উল্লেখযোগ্য হচ্ছে ১৯৬০ সালের রাজধানী ঢাকায় ধর্মরাজিক বৌদ্ধ বিহার প্রতিষ্ঠার, ১৯৫৪ সালে বার্মায় অনুষ্ঠিত ষষ্ঠ সংগীতিতে যোগদান, ১৯৫৬ সালে তাঁর নেতৃত্বে দেশে আন্তর্জাতিক বৌদ্ধ জয়ন্তী উদযাপন, ১৯৭২ সালে ধর্মরাজিক অনাথালয় প্রতিষ্ঠা, বন্দর নগরী চট্টগ্রামে ১৯৭৮ সালে নব পন্ডিত বিহার প্রতিষ্ঠা, ১৯৭৮ সালে মহাচীন থেকে বাংলার বরণ্য সন্তান অতীশ দিপংকরের পবিত্র ধাতু আনয়ান, ১৯৯২ সালে ভারতের বুদ্ধগয়ায় বৌদ্ধদের বাংলাদেশী তীর্থনিবাস নির্মাণের জন্য জমি লাভ ইত্যাদি।^{২৫}

বৌদ্ধ ধর্মাবলম্বীদের মহান নেতা, বাংলাদেশের কৃতী সন্তান ও আন্তর্জাতিক খ্যাতি সম্পন্ন শান্তিবাদী নেতা বিশুদ্ধানন্দ মহাথেরো ২ মার্চ ১৯৯৮ বুধবার যখন মহাপ্রয়ান তখন মনে হয়েছিল বাংলার আকাশের একটি তারা যেন খসে পড়লো। মহাথেরের মৃত্যুতে আবাল-বৃদ্ধ-বনিতা বিভিন্ন রাজনৈতিক নেতৃবৃন্দ, সাংস্কৃতিক, সামাজিক ও ছাত্র সংগঠনের নেতৃবৃন্দ শোক প্রকাশ করেছেন। প্রধানমন্ত্রী, রাষ্ট্রপতি, বিরোধী দলীয় নেত্রী, মন্ত্রী ও বিদেশীদের শোক ও শ্রদ্ধাঞ্জলি তারই প্রমাণ। তাঁকে একনজর দেখার জন্য শোক মিছিলে অংশগ্রহণ করার জন্য লক্ষ জনতার ভিড় একটা বিরল দৃষ্টান্ত। বাংলাদেশের প্রখ্যাত ধর্মীয় নেতা, আন্তর্জাতিক খ্যাতিসম্পন্ন মনীষী মহামান্য সংঘনায়ক বিশুদ্ধানন্দ মহাথের, বাংলাদেশ বৌদ্ধ কৃষ্টি প্রচার সংঘ ও বিশ্ব বৌদ্ধ ধর্ম শান্তি সম্মেলন সংস্থার বাংলাদেশ অঞ্চলের সভাপতি দায়িত্ব পালন করেন। বাংলাদেশ সরকারের বৌদ্ধ ধর্মীয় কল্যাণ ট্রাস্টের ভাইস চেয়ারম্যান, বাংলাদেশ সংস্কৃৎ ও পালি শিক্ষা বোর্ডের সচিব হিসেবেও সুদীর্ঘকাল দায়িত্ব পালন করেছেন। তাঁর মানবতাবাদী বিপুল কর্মকাণ্ড ও বিশ্বশান্তির জন্য অবদানের স্বীকৃতি স্বরূপ মঙ্গোলিয়া থেকে এশীয় সুবর্ণ শান্তি পদক এবং নরওয়ে থেকে মহাত্মা গান্ধী শান্তি পুরস্কারে ভূষিত হন।

মহাসংঘনায়ক বিশুদ্ধানন্দ মহাথের বাংলাদেশের বৌদ্ধদের অনন্য সংঘমনীষা ছিলেন। ১৯৭১ সালে মুক্তিযুদ্ধ শুরু হলে বিশুদ্ধানন্দ মহাথের পাকিস্তান সরকারের নিকট এদেশের বৌদ্ধদের জান-মাল রক্ষার জন্য আবেদন জানান। তার পরিপ্রেক্ষিতে সরকারের সম্মতিক্রমে তিনি বৌদ্ধদের পরিচয় পত্র প্রদান করেন। প্রায় ৭০ হাজার চীনা বুডিডিস্ট পরিচয় পত্র নিয়ে শুধু বৌদ্ধ নয়, বহু হিন্দু, মুসলিম এবং মুক্তিযোদ্ধারা জীবন রক্ষা করেছিলেন। মহাথের এ সময়ে বাংলাদেশের বিভিন্ন বৌদ্ধ জনসাধারণকে অভয় দিয়েছেন, বৌদ্ধদের অবস্থার কথা অবহিত করেছেন। এ সময়ে তাঁর সহযোগি হিসেবে শহীদ জিনানন্দ ভিক্ষু, শহীদ ননী গোপাল বড়ুয়া, প্রয়াত সংঘনায়ক প্রিয়ানন্দ মহাথের, শ্রীমৎ শুদ্ধানন্দ মহাথের, প্রয়াত বোধিপাল মহাথের, সংঘনায়ক এস. ধর্মপাল মহাথের, অনুনায়ক শুদ্ধানন্দ মহাথের, সাংবাদিক ডি.পি. বড়ুয়া, শ্রীমৎ বনশ্রী মহাথের, বাবু শীলব্রত বড়ুয়া, প্রয়াত সুগতানন্দ মহাথের, প্রয়াত শাক্যবোধি মহাশুভির, উ জিনিতা মহাথের, ডা. ইন্দুভূষণ বড়ুয়া, অশ্বিনি রঞ্জন বড়ুয়া, প্রকৌশলী ব্রহ্মদত্ত বড়ুয়া, উ. পাণ্ডিতা মহাথের ও আরো অনেকে তাঁর সাথে সহযোগি হিসেবে কাজ করেছেন।

১৯৭১ সালে ১ মে জেনারেল টিক্কাখান বিশুদ্ধানন্দকে ডেকে নিয়ে বিবৃতি দেয়ার জন্য চাপ দেন। তিনি রাজি হলেন না। বিশ্বধর্ম ও শান্তি সম্মেলনে অত্যাচার নিপীড়ন, হত্যা, ধর্ষণের বিবরণ তুলে ধরেন। অনেক মুক্তিযোদ্ধা ও সাধারণ মানুষকে তিনি ঢাকা ধর্মরাজিক বৌদ্ধ বিহারে আশ্রয় দিয়ে জীবন রক্ষা করেছিলেন। তিনি শিল্পী আলতাফ মাহমুদ ও দানবীর আর পি সাহাকে রক্ষার জন্য আশ্রয় চেষ্টা করে ব্যর্থ হন। মুক্তিবাহিনী ও মিত্রবাহিনী এই বিহার থেকে ঢাকা শহরের একাধিক অপারেশন চালিয়েছেন।^{১৬}

স্বাধীনতা যুদ্ধ চলাকালে বিশুদ্ধানন্দ মহাথেন তাঁর দৈনন্দিন জীবনের বিচিত্র কার্যাবলী নিয়ে ১৯৭২ সালে রচনা করেন ‘রক্ত ঝরা দিনগুলিতে’ শীর্ষক ৪৫ পৃষ্ঠার এক ক্ষুদ্র পুস্তিকা। এই পুস্তিকাটি ‘বাংলাদেশের স্বাধীনতা যুদ্ধ : দলিলপত্র’ এর চতুর্থ খণ্ডে ছবছ বর্ণিত আছে। তিনি তাঁর জ্ঞান মেধা ও বুদ্ধিমত্তা দিয়ে এই বৌদ্ধ সম্প্রদায়কে রক্ষা করেছিলেন। শুধু তাই নয় যুদ্ধকালীন স্বাধীনতা লাভের জন্য গুরুত্বপূর্ণ ভূমিকা পালন করেন। ধর্ম, সমাজ, সাংগঠনিক কর্মকাণ্ড হিসেবে মহাসংঘনায়ক বিশুদ্ধানন্দমহাথের বহু প্রতিষ্ঠান গড়ে তুলেন। তাঁর এ অমূল্য অবদানের জন্য মহাত্মা গান্ধী শান্তি পদক, এবং বাংলাদেশ সরকারের মহান একুশে পদক প্রদান করেন।^{১৭}

মুক্তিসংগ্রামে শহীদ জিনানন্দ ভিক্ষু

ভিক্ষু জিনানন্দ ছিলেন সমাজসেবক, ত্রিপিটক বিশারদ ও বৌদ্ধ ভিক্ষু। জমিদার পরিবারে জন্মগ্রহণ করেও ছিলেন সংসারবিমুখ। মানুষের কল্যাণে নিজেই নিয়োজিত করেছিলেন। বৌদ্ধ বিহারে থেকে বৌদ্ধ ছেলেমেয়েদের নৈতিক শিক্ষা দিতেন। একান্তরে মুক্তিযুদ্ধ চলাকালে জিনানন্দ গোপনে মুক্তিযোদ্ধাদের সাহায্য-সহযোগিতা করেন। বৌদ্ধ কৃষ্টি প্রচার সংঘের সভাপতি সংঘনায়ক বিশুদ্ধানন্দ মহাথের তখন পাকিস্তানি সেনাদের হাত থেকে বৌদ্ধদের বাঁচানোর জন্য চট্টগ্রামে একটি অফিস প্রতিষ্ঠা করেন। এই অফিসের কর্মাধ্যক্ষ ছিলেন ভিক্ষু জিনানন্দ। এখান থেকে বৌদ্ধদের পরিচয়পত্র দেওয়া হত, সেটা দেখলে পাকিস্তানি সেনারা পরিচয়পত্রদারীকে হত্যা করত না। চট্টগ্রাম অঞ্চলে দেশের স্বাধীনতার জন্য যুদ্ধরত অনেক গেরিলা মুক্তিযোদ্ধার সাথে ভিক্ষু জিনানন্দের যোগাযোগ ছিল। তিনি সেই সব যোদ্ধার অনেককে বৌদ্ধ বিহারে পরিচয়পত্র দিয়েছিলেন। এ ছাড়াও তিনি তাঁর গাড়িতে মুক্তিযোদ্ধাদের জন্য টাকাপয়সা ও সাহায্য দ্রব্যাদিবহন করা ছাড়া অস্ত্রও বহন করতেন।

মুক্তিযুদ্ধের সপক্ষে জিনানন্দের এই তৎপরতার কথা একসময় পাকিস্তান সেনাবাহিনীর এদেশীয় দোসর রাজাকারদের কাছে ফাঁস হয়ে যায়। ১৩ ডিসেম্বর রাজাকাররা তাঁকে অপহরণ করে নিয়ে যায়। এরপর কোথাও তাঁর খোঁজ পাওয়া যায়নি। বাংলাদেশের মুক্তিযুদ্ধে বেশ কয়েকজন বৌদ্ধ শহীদ হন।^{১৮}

১৯৭১ সালের দুঃসহ দিনে বৌদ্ধদের রক্ষার জন্য পাশে এসে দাঁড়ালেন বৌদ্ধ কৃষ্টি প্রচার সংঘের সভাপতি সংঘনায়ক বিশুদ্ধানন্দ মহাথের। তিনি চট্টগ্রামের বিভিন্ন এলাকার সাথে যোগাযোগ ও অন্যান্য কার্যক্রম চালানোর জন্য চট্টগ্রাম শহরে একটি অফিস স্থাপন করেন। ভিক্ষু জিনানন্দ ছিলেন সে অফিসের কর্মাধ্যক্ষ। সে সময় বৌদ্ধ কৃষ্টি প্রচার সংঘ বৌদ্ধদের নিরাপত্তার জন্য পরিচিতিপত্র বিলি করেছিলেন বৌদ্ধদের মাঝে। পরিচিতিপত্র দেখলে পাকসেনা এবং তাদের দোসররা বৌদ্ধদের নির্যাতন করত না। ভিক্ষু জিনানন্দের সাথে সম্পর্ক ছিল মুক্তিপাগল দামাল ছেলেরা। তিনি এ রকম অনেক পরিচিতিপত্র বৌদ্ধ ছাড়াও অনেক যুককে দিয়েছিলেন। এ পরিচিতিপত্র নিয়ে অনেকে ভারতে গিয়ে মুক্তিযুদ্ধে অংশ নেয় ও প্রশিক্ষণ সমাপ্ত করে দেশে এসে যুদ্ধে সক্রিয় অংশগ্রহণ করে। অধিকন্তু তিনি মুক্তিযোদ্ধাদেরও পরিচিতিপত্র দিয়েছিলেন, যাতে তারা অবাধে চলাফেরা করতে পেরেছিল। অসীম সাহজের অধিকারী এই বৌদ্ধ সন্ন্যাসী গোপনে মুক্তিযোদ্ধাদের সহায়তা করেছিলেন এবং দেশের অভ্যন্তরে থেকে মুক্তিসংগ্রামে অংশ নিয়েছিলেন। তাঁর গোপন তৎপরতার কথা ফাঁস হয়ে যায়। তখন তিনি পটিয়া থানার পাঁচরিয়া গ্রামের বৌদ্ধবিহারে অবস্থান করেছিলেন। দেশ স্বাধীন হওয়ার দুদিন পূর্বে রাজাকাররা তাঁকে অপহরণ করে নিয়ে যায়। তিনি নিখোঁজ হন ১৩ই ডিসেম্বর তারিখে তারপর থেকে তাঁর আর কোনো খোঁজ পাওয়া যায়নি। মহান মুক্তিযুদ্ধে তাঁর অবদান জাতি কোনদিন ভুলতে পারবে না।^{১৯}

মুক্তিযুদ্ধে বৌদ্ধদের স্বতস্কৃত অংশগ্রহণ ও মূল্যায়ন

রক্তাক্ত যুদ্ধের মাধ্যমে বাংলাদেশ সৃষ্টির ইতিহাসের সাথে এদেশের বৌদ্ধরাও জড়িত। ব্রিটিশ বিরোধী আন্দোলনের কর্মকাণ্ডকে অব্যাহত রেখে বাঙ্গালী বৌদ্ধ সম্প্রদায় পাক আমলে এদেশের সকল গণতান্ত্রিক ও প্রগতিশীল আন্দোলনে অংশগ্রহণ করেছিলেন। এর মধ্যে আদিবাসী মুক্তিযোদ্ধাদের মধ্যে মং রাজা মংপ্রুং সেইন চৌধুরী,^{২০} বীর বিক্রম প্লাটুন কমান্ডার উ. ক্য চিং^{২১} ও কৃষিবিদ উ. সিট মং^{২২} অন্যতম। কৃষক আন্দোলন, শ্রমিক আন্দোলন ও ছয় দফা আন্দোলনসহ ঊনসত্তরের গণ অভ্যুত্থান এবং একান্তরের অসহযোগ

আন্দোলনে বৌদ্ধরা সক্রিয়ভাবে অংশগ্রহণ করেছিলেন। এ কারণে ১৯৭১ সালের ২৫ শে মার্চ এবং তৎপরবর্তীকালে পাক সেনা ও তাদের দোসরদের জগন্য আক্রমণ থেকে বৌদ্ধরা রেহাই পাইনি। লুণ্ঠন, ধর্ষণ ও অগ্নি সংযোগের হাত থেকে বৌদ্ধরা রক্ষা পায়নি। বৌদ্ধ গ্রাম ও বৌদ্ধ বিহার আক্রান্ত হয়েছে, বুদ্ধমূর্তি ভেঙ্গে ফেলা হয়েছে এবং অনেক বৌদ্ধ বাড়িতে অগ্নি সংযোগ করা হয়েছে। বৌদ্ধ ভিক্ষুদের লাঞ্চিত করা হয়েছে। বুদ্ধ সংঘরাজ অভয়তিষ্য মহাথেরও এ নির্যাতন থেকে রেহাই পাননি। অনেক বৌদ্ধ বিহার বৌদ্ধ গ্রাম লুণ্ঠিত হয়েছে। কোন কোন স্থানে মেয়েদের সম্মম লুণ্ঠিত হয়েছে। এ সময় কেউ কেউ প্রাণভয়ে মিয়ানমার ও ভারতে আশ্রয় গ্রহণ করে। কিন্তু এর মাঝেও বঙ্গবন্ধু শেখ মুজিবুর রহমানের আহ্বানে বৌদ্ধরা কোন কোন গ্রামে দুর্বীর প্রতিরোধ গড়ে তুলেন। তন্মধ্যে রাউজান থানার আবুরখীল গ্রামের নাম বিশেষভাবে উল্লেখযোগ্য। আবুরখীল গ্রামের বহু হিন্দু নর-নারী আশ্রয় নেন। এ গ্রাম থেকে মদুনাঘাট, ষোলশহর ও কালুঘাট ইপআর বাহিনী ও মুক্তিযোদ্ধাদের খাদ্য সরবরাহ করা হয় গ্রামে মুক্তিযোদ্ধা সহায়ক সমিতি গঠন করা হয় এ গ্রামের লোকেরা জীবনের ঝুঁকি নিয়ে মুক্তি যোদ্ধাদের আশ্রয় দিয়েছিলেন এবং মিনি হাসপাতাল স্থাপন করে আহত মুক্তিযোদ্ধাদের চিকিৎসা করতেন। এয়ার মার্শাল সুলতান মাহমুদের ছোটভাই মুক্তিযোদ্ধা আবদুল মান্নান এই গ্রামের শহীদ হন এবং তাকে এখানে কবর দেয়া হয়। স্বাধীনতার পর এয়ার মার্শাল সুলতান মাহমুদ এর ছোটভাইয়ের কবর জিয়ারতের জন্য আবুরখীল আগমন করেন। আবুরখীলে ক্যাপ্টেন সুলতান মাহমুদ তার দলবল নিয়ে যুদ্ধ করেছিলেন। এ গ্রামে অবস্থান গ্রহণ করে মুক্তিযোদ্ধা রুমী, রশ্মি, কামাল, ইদ্রিস, মোজাম্মেল, চিত্ত ও কদার বিভিন্ন দিকে যুদ্ধ পরিচালনা করেন। সেপ্টেম্বর মাসে আবুরখীলের কেরানীহাটে রাজাকারদের সাথে মুক্তিযোদ্ধাদের সংঘর্ষ হয়। এতে অনেক রাজাকার মারা যান। এ যুদ্ধে বিকাশ বড়ুয়া শহীদ হন। আবুরখীল ছাড়াও বৌদ্ধ গ্রাম পাহাড়তলী, পদুয়া গ্রামে পতিরোধ তৎপরতা দেখা যায়। পদুয়ার জঙ্গলে স্থাপিত হয়েছিল মুক্তিযোদ্ধাদের অন্যতম ঘাঁটি। পাহাড়তলী গ্রামের তালতলী পাহাড় ছিল মুক্তিযোদ্ধাদের অন্যতম রিক্রুটিং ও প্রশিক্ষণ কেন্দ্র। সঙ্গীতাচার্য জগদানন্দ বড়ুয়া এ কেন্দ্রের অন্যতম সংগঠক ছিলেন। তার সাথে পাহাড়তলীগ্রামের সাহসী যুবকেরা কাজ করেছিল। রাঙ্গুণীয়া থানার বেতাগী গ্রামের বৌদ্ধ পল্লীতে ক্যাপ্টেন করিম ও ক্যাপ্টেন আলম আশ্রয় নিয়েছিলেন এবং মুক্তিযুদ্ধ পরিচালনা করেছিলেন। এই গ্রামের ডা. কিরণচন্দ্র বড়ুয়া আহতদের চিকিৎসা করতেন। হাজারীচর গ্রামের ডা. চারুচন্দ্র বড়ুয়া জীবনের ঝুঁকি নিয়ে আহত মুক্তিযোদ্ধাদের চিকিৎসা সেবা প্রদান করতেন। রাউজানের আর্মিড ইনস্টিটিউশন ছিল শরণার্থী ও মুক্তিযোদ্ধাদের ট্রেনজিট ক্যাম্প। এভাবে বাংলাদেশের স্বাধীনতা যুদ্ধে বৌদ্ধরা প্রত্যক্ষভাবে অংশগ্রহণ করেন এবং এদেশের বৌদ্ধ গ্রামগুলিতে মুক্তি বাহিনীর আশ্রয় কেন্দ্র গড়ে উঠে। প্রতিটি বৌদ্ধ গ্রামের অপেক্ষাকৃত তরুণ বৌদ্ধ ছেলেরা মুক্তি বাহিনীতে যোগদান করে এবং মুক্তিযুদ্ধে বিশেষ অবদান রাখেন। কক্সবাজার জেলার রামু, কক্সবাজার, পালং ও উখিয়ার বৌদ্ধ গ্রামগুলিতে পাক বাহিনীর ধ্বংসযজ্ঞ চালায়। ১৯৭১ সালের এপ্রিল মে মাসে পাক বাহিনী রামুর একাধিক মহাজন বাড়ি, কক্সবাজার শহরের প্রখ্যাত হেডমাস্টার অমিয়কুমার বড়ুয়া, অমিতশ্রী বড়ুয়া, সঞ্জয় বড়ুয়াদের বাড়ি এবং রত্না পালং এর আশিকা চরন বড়ুয়া, সাবেক ডেপুটি ম্যাজিস্ট্রেট ধনঞ্জয় বড়ুয়ার বাড়ি, অনিন্দ কুমার বড়ুয়ার বাড়ি এবং ভালুকিয়া পালং এর যোগেন্দ্র সিকদারের বাড়িতে অগ্নি সংযোগ করেন। কক্সবাজার জেলার উখিয়া থানার দীপক বড়ুয়া প্রথম দিকে পাকসেনাদের গুলিতে নিহত হন। তিনি একাত্তরের চট্টগ্রামের প্রথম শহীদ বলে জানা যায়। উখিয়া থানার রুমখা পালং গ্রামের ভট্ট বড়ুয়াকে হাত-পা বেঁধে পাকবাহিনী নির্মমভাবে হত্যা করেন। কক্সবাজার জেলার স্থানীয় আওয়ামী লীগ নেতা মোজাম্মেল হক, মোস্তাক আহমেদ, এডভোকেট আহমেদ হোসেন, শমসের আলম চৌধুরী সহ অন্যান্য নেতৃবর্গ, সংসদ সদস্য সরওয়ার ওসমান চৌধুরী, সাবেক ইপিআর সদস্য, পুলিশ বাহিনীর সদস্য ও স্থানীয় যুবকদের সাথে বৌদ্ধরা পার্শ্ববর্তী মিয়ানমারে আশ্রয় গ্রহণ করে। প্রণব কুমার বড়ুয়া তাঁর “মুক্তিযুদ্ধে বাঙ্গালি বৌদ্ধসম্প্রদায়”^{২০} গ্রন্থের দ্বিতীয় অনুচ্ছেদে মুক্তি সংগ্রামের অংশগ্রহণকারী ৪৮ জন বৌদ্ধ শহীদের পরিচয় লিপিবদ্ধ করেছেন। এ অনুচ্ছেদে তিনি পয়ত্রিশ জন বিশিষ্ট বৌদ্ধ মুক্তিযোদ্ধাদের নাম ও পরিচয় প্রকাশ করেন। তাছাড়া এ গ্রন্থে তিনি জেলা ওয়ারী বৌদ্ধ মুক্তিযোদ্ধাদের যে তালিকা প্রদান করেন তাতে দেখা যায় চট্টগ্রাম জেলায় ২৩২, কক্সবাজার জেলায় ১২, নোয়াখালী জেলায় ৩২, কুমিল্লা জেলায় ১, খাগড়াছড়ি জেলায় ২, বান্দরবান জেলায় ১, জনের নাম দেখা যায়। ১৯৭১ সালে মুক্তিযুদ্ধ চলাকালীন সময়ে অনেক অসহযোগ আন্দোলনে অংশ নিয়ে অফিস আদালত ও চাকুরিতে যোগদান থেকে বিরত ছিলেন। অনেকে ভারতে আশ্রয় নিয়েছিলেন এবং প্রবাসী বাংলাদেশ সরকারের সাথে যোগাযোগ স্থাপন পূর্বক মুক্তিযুদ্ধের পক্ষে কাজ করেছিলেন। তারা ভারতের বিভিন্ন স্থানে সভায় ভাষন দিয়েছেন, মুক্তি যুদ্ধের কথা বলেছেন এবং পাক সেনাদের অত্যাচারের চিত্র তুলে ধরেন। অনেকে বিভিন্ন স্থানে বিভিন্ন রাজনৈতিক দলের নেতৃবৃন্দের সাথে ও বুদ্ধিজীবীদের সাথে যোগাযোগ করেছেন।^{২৪}

বৌদ্ধ ভিক্ষুদের মধ্যে জ্যোতিঃপাল মহাথের, কুমিল্লার ধর্মরক্ষিত ভিক্ষু, সংঘরক্ষিত ভিক্ষু, পূর্ণানন্দ মহাথের ও চট্টগ্রামের শান্তপদ মহাথের স্বাধীনতার সপক্ষে জনমত গড়ে তোলার জন্য ভারতে আশ্রয় গ্রহণ করেন। পণ্ডিত জ্যোতিঃপাল মহাথের বিদেশে মুজিব নগর সরকারের প্রতিনিধি হিসাবে মুক্তিযুদ্ধের পক্ষে জনমত গঠনে একজন প্রকৃত দেশপ্রেমিকের অনন্য দৃষ্টান্ত স্থাপন করেন। প্রবাসী সরকার কর্তৃক পণ্ডিত জ্যোতিঃপাল মহাথের এবং তাঁর সঙ্গী অ্যাডভোকেট ফকির সাহাবুদ্দিন বৌদ্ধ রত্ন শ্রীলংকার বিভিন্ন স্থানে প্রচারণাসহ তৎকালীন প্রধানমন্ত্রী মিসেস বন্দরনায়েকের সাথে সাক্ষাত করে অস্ত্রবাহী পাকিস্তানি বিমানের কলম্বো হয়ে ঢাকা হয়ে যাতায়াত বন্ধ

করান। এছাড়া থাইল্যান্ড, জাপান, ভ্রমণ করে মুক্তিযুদ্ধের পক্ষে কাজ করেন। প্রণোদিত বড়ুয়া, বিপ্রদাশ বড়ুয়া, সুব্রত বড়ুয়া ও রণধীর বড়ুয়া স্বাধীন বাংলা বেতার কেন্দ্রের সাথে ঘনিষ্ঠভাবে সম্পৃক্ত ছিলেন। পার্থ প্রতিম বড়ুয়া ভারতে সাপ্তাহিক অমর বাংলা প্রকাশ করে মুক্তিযুদ্ধের চেতনায় জনগণকে উদ্বুদ্ধ করেন। বিপ্লব বড়ুয়া নামে আরেকজন সাহিত্যিক বিদেশে মুক্তিযুদ্ধেরসাথে জড়িত ছিলেন বলে জানা যায়। তাঁর প্রচারিত কথিকা মুক্তাঞ্জলে বাংলাদেশের স্বাধীনতার যুদ্ধের সময় প্রচারিত হয় বলে স্বাধীনতা যুদ্ধের দলিলপত্রের ৫ম খণ্ডে বর্ণিত আছে। বাংলাদেশের অভ্যন্তরে আরেকজন বৌদ্ধ ভিক্ষু সংঘনায়ক বিশুদ্ধানন্দ মহাথের মুক্তিযুদ্ধের স্বপক্ষে অনন্য ভূমিকা পালন করেন।^{২৫}

মুক্তি সংগ্রাম চলাকালে বিশুদ্ধানন্দ মহাথের বৌদ্ধদের জানমাল রক্ষার জন্য ব্যাপকভাবে বৌদ্ধ অধ্যুষিত গ্রামগুলি সফর করেন। তিনি এ সময় প্রায় ১২ হাজার মাইল ভ্রমণ করেন এবং বৌদ্ধ, হিন্দু ও মুক্তিযোদ্ধাদের আত্মরক্ষার জন্য ৭০ হাজার পরিচয় পত্র প্রদান করেন। বৌদ্ধ হিসেবে এই পরিচয় পত্র নিয়ে অনেক অবৌদ্ধ যুবক সামরিক শাসকদের ফাঁকি দিয়ে সীমান্ত অতিক্রম করে ভারতে আশ্রয় নিয়ে মুক্তি সংগ্রামে যোগ দিয়েছিল। অনেক হিন্দু পরিবার নিরাপদে সীমান্ত অতিক্রম করেছিল। তিনি সে সময় অনেক হিন্দু পরিবারকে ধর্মান্তর থেকে রক্ষা করেছিল। জৈনক কমান্ডারসহ পাঁচজন মুক্তিযোদ্ধাকে তিনি ঢাকা ধর্মরাজিক বৌদ্ধ মহাবিহারে আশ্রয় দিয়েছিলেন। মহাথের ঢাকার কমলাপুর, সবুজবাগ, ঠাকুরপাড়া, আহমদবাগ এলাকার জনগণকে পাকসেনাদের অত্যাচার থেকে রক্ষা করেছিলেন। মাননীয় বিশুদ্ধানন্দ মহাথের স্বদেশে অবস্থান পূর্বক মুক্তিযুদ্ধে সহায়তা প্রদান করেন। বাংলার মুক্তিযুদ্ধের ইতিহাসে তাঁর অবদান বাঙালি জাতি কোনদিন ভুলতে পারবে না।

উপসংহার

আলোচনার আলোকে বলা যায় যে, বাংলাদেশের বৌদ্ধ জনগোষ্ঠীর স্বাধীনতা স্বজাত্যবোধের চিরায়ত ধর্মীয় ধারায় কালে কালে প্রগতিশীল আন্দোলন, ভাষা আন্দোলন এবং মহান মুক্তিযুদ্ধে অবদান ছিল অপারিসীম। পৃথিবীর মানচিত্রে বাংলাদেশের অভ্যুদয় আমাদের রক্তাক্ত সংগ্রামের এক ঐতিহাসিক ফলশ্রুতি। স্বৈচ্ছাচারী শাসনের অবসানের পর ব্যাপক শানবতাবোধ উদ্বুদ্ধ এক নতুন বাঙালি জাতি জন্মলাভ করল। এখানে ধর্ম কিংবা বর্ণ জাতির কোন ভিত্তি নেই। আজকের ধর্ম নিরপেক্ষ গণতান্ত্রিক বাংলাদেশ মানবতাবোধে অনুপ্রাণিত। ঐতিহ্য ও উত্তরাধিকারের নতুন অশেষায় বাঙালি তার প্রাচীন সংস্কৃতিকে আবিষ্কার করেছে হিন্দু, মুসলমান, বৌদ্ধ খৃষ্টানের সম্মিলিত শ্রোত ধারায়। বাংলার পলি মাটিতে যুগে যুগে বিভিন্ন ধর্ম ও সংস্কৃতির উত্থান পতন ঘটেছে এবং এর মাধ্যমে সমন্বয় ও সঙ্গীকরণের নতুন ভাবধারা রচিত হয়েছে। আজকে শ্রদ্ধার সাথে স্মরণ করছি ঘাতকের অস্ত্রে শহীদ হওয়া লাখ লাখ বাঙালিকে অভিনন্দন জ্ঞাপন করছি বীর মুক্তিযোদ্ধাদের। এর সাথে ক্ষুদ্র বৌদ্ধ সম্প্রদায়ভুক্ত যে সকল যুবক মাতৃভূমির উদ্ধারকল্পে শহীদ হয়েছেন। পণ্ডিত জ্যোতিপাল মহাথের বাংলাদেশের স্বাধীনতা সংগ্রামে স্বাধীনতা লাভের ক্ষেত্রে অগ্রণী ভূমিকা পালন করেছিলেন। তাই বাংলাদেশের মহান মুক্তিযুদ্ধে বৌদ্ধ সম্প্রদায়ের অংশগ্রহণ, বহির্বিশ্বের বৌদ্ধ রাষ্ট্রসমূহ হতে সমর্থন আদায় ও বাংলাদেশের অবস্থান সম্পর্কে জনমত প্রচারে বিশেষ অবদান রাখেন। প্রত্যক্ষ ও পরোক্ষ ভাবে মুক্তিযুদ্ধে অংশগ্রহণকারী সকল বৌদ্ধ মুক্তিযোদ্ধাদের যথার্থ মূল্যায়ণ করা বর্তমান সরকারের নৈতিক দায়িত্ব। মহান মুক্তিযুদ্ধের সংগঠক পণ্ডিত জ্যোতিপাল মহাথের স্মৃতিকে সবার কাছে পৌঁছে দেওয়ার জন্য সরকারের সহায়তায় একটি পণ্ডিত জ্যোতিপাল স্মৃতি যাদুঘর নির্মাণ সময়ের দাবি। এছাড়া সকল বৌদ্ধ মুক্তিযোদ্ধার তালিকা, স্মৃতি প্রদান মুক্তিযোদ্ধা পরিবারের জন্য সহায়তা প্রদান করা অত্যন্ত জরুরি। বাংলাদেশ স্বাধীনতা সংগ্রামে বহির্বিশ্ব জ্যোতিপাল মহাথের অবদান বাঙালি বৌদ্ধদের কাছে নিঃসন্দেহে গৌরবের বিষয়। জাতির জনক বঙ্গবন্ধু শেখ মুজিবুর রহমানের সরকারের প্রতিনিধি হয়ে বাংলাদেশের পক্ষে বিশ্বজনমত গঠনে দক্ষিণ পূর্ব এশিয়ার বিভিন্ন দেশ সফর করে বিপুল অবদান রাখতে সক্ষম হন। বাংলার স্বাধীনতার ইতিহাস যতদিন থাকবে ততদিন স্বর্ণক্ষরে পণ্ডিত জ্যোতিপাল মহাথের অবদান লিপিবদ্ধ থাকবে। আমাদের চিন্তা চেতনা যেমন বাঙালিদের প্রগাঢ় অনুভূতিতে লালিত হবে তেমনি সংস্কারমুক্ত পরিবেশে স্বাধীনতার যে আলো আমাদের দুয়ারে উজ্জ্বলিত সে আলোর প্রেরণায় বৌদ্ধ সম্প্রদায় আরো নতুন ভাবে ভবিষ্যতের দিকে অনেক দূর এগিয়ে যাবে।

তথ্য নির্দেশ ও টীকা

১. প্রণব কুমার বড়ুয়া, মুক্তিযুদ্ধে বাঙালি বৌদ্ধ সম্প্রদায়, বাংলা একাডেমি, ঢাকা, ১৯৯৮, পৃ. ১৩৭
২. বাংলাদেশের বৌদ্ধ বিহার ও ভিক্ষু জীবন, ভিক্ষু সুনীথানন্দ, বাংলা একাডেমী, ঢাকা, জুন, ১৯৯৫, পৃ. ৭৬
৩. ড. জগন্নাথ বড়ুয়া, মুক্তিযুদ্ধে বৌদ্ধদের অবদান : চট্টগ্রাম অঞ্চল, বাংলাদেশ ইতিহাস সম্মিলনী, ঢাকা. ২০১৬, পৃ. ১৪১-১৪৪
৪. পূর্বোক্ত, মুক্তিযুদ্ধে বৌদ্ধদের অবদান : চট্টগ্রাম অঞ্চল, পৃ. ১২৬-১২৭
৫. পূর্বোক্ত, মুক্তিযুদ্ধে বৌদ্ধদের অবদান : চট্টগ্রাম অঞ্চল, পৃ. ১৩৭

৬. পণ্ডিত জ্যোতিপাল মহাথের, বাংলাদেশ মুক্তি সংগ্রাম, দ্বিতীয় সংস্করণ, বিশ্বশান্তি প্যাগোডা, চট্টগ্রাম বিশ্ববিদ্যালয়, ১৯৯৭, প্রথম সংস্করণে লেখকের বক্তব্য, পৃ. ৪-৫
৭. পূর্বোক্ত, বাংলাদেশ মুক্তি সংগ্রামে, জ্যোতিপাল মহাথের, পরিচিতি প্রসঙ্গ, সদস্য রাষ্ট্রপতির উপদেষ্টা পরিষদ, ঢাকা, ৫-৭-১৯৭৬, পৃ. ৩
৮. পূর্বোক্ত, বাংলাদেশ মুক্তি সংগ্রাম, পৃ. ১১
৯. পূর্বোক্ত, বাংলাদেশ মুক্তি সংগ্রাম, পৃ. ১৩
১০. পূর্বোক্ত, বাংলাদেশ মুক্তি সংগ্রাম, পৃ. ১৫
১১. পূর্বোক্ত, বাংলাদেশ মুক্তি সংগ্রাম, বিশ্ববৌদ্ধ সৌভ্রাতৃত্ব সংঘের মাসিক পত্রিকা, সেপ্টেম্বর সংখ্যা, ২৫১৪, বুদ্ধান্দ, ১৯৭১, পৃ. ৪৫
১২. পূর্বোক্ত, বাংলাদেশ মুক্তি সংগ্রাম পৃ. ৪৬-৪৭
১৩. Bangladesh in Liberation Struggle, Ven. Jyotipal Mahathera, translated by JewelBarua, Sougata Prakashan, Dhaka, 2016, P. 59-60
১৪. Ibid, Bangladesh in Liberation Struggle, P.63
১৫. একুশে পদক প্রাপ্ত মহাসংঘনায়ক বিশুদ্ধানন্দ মহাথের, প্রণব রাজ বড়ুয়া, ত্রৈমাসিক কৃষ্টি, বাংলাদেশ বৌদ্ধ কৃষ্টি প্রচার সংঘ, পৃ. ৪৫-৪৭
১৬. জিতেন্দ্র লাল বড়ুয়া, আত্মঅন্বেষণ : বাংলাদেশে বৌদ্ধধর্ম ও বৌদ্ধ সম্প্রদায়, বাংলা একাডেমি, ঢাকা, ১৯৯৯, পৃ. ৭
১৭. ব্যক্ত হোক জীবনের জয়, ১ম খন্ড, শুদ্ধানন্দ মহাথের, ঢাকা, ২০০৭, পৃ. ৮৬-৮৭
১৮. দৈনিক প্রথম আলো, দেশপ্রেমে উজ্জীবিত নন্দিত নাম, শহীদ জিনানন্দ ভিক্ষু, ২১ এপ্রিল, ২০১৫, পৃ. প্রথম পাতা
১৯. স্মৃতি ১৯৭১, দ্বাদশ খন্ড, প্রথম প্রকাশ ১৯৯৯, সম্পাদনা-রশীদ হায়দার
২০. মুক্তিযুদ্ধে মং রাজা মংফ্র সেইন এর অবদান : কুমার মংফ্র সেইন ছিলেন রাজকুমারী নানুমার একমাত্র জীবিত সন্তান এবং মংরাজা নেফ্র চেইনের নাতি। পাকিস্তানী শাসকদের প্রতি তাঁর ছিল প্রবল ঘৃণা। পাকিস্তানী শাসকগোষ্ঠী পার্বত্য অঞ্চলের দেশীয় রাজাদের অনেক ক্ষমতা কেড়ে নিয়েছিল। ১৯৭১ সালের ১ মার্চ জাতির উদ্দেশে এক বেতার ও টেলিভিশন ভাষণে পাকিস্তানের সামরিক শাসক জেনারেল ইয়াহিয়া খান ৩ মার্চ ঢাকায় অনুষ্ঠিতব্য জাতীয় সংসদের অধিবেশন অনির্দিষ্টকালের জন্য স্থগিত ঘোষণা করলে প্রতিবাদে দেশের অন্যান্য অঞ্চলের মতো খাগড়াছড়ি পার্বত্য জেলায় ও বিক্ষোভ মিছিল বের করে। মং রাজা মংফ্র সেইন এর নেতৃত্বে শুরু হয় দুর্বীর আন্দোলন। এবং তাঁর আহ্বানে স্বাধীনবাংলা ছাত্র সংগ্রাম পরিষদের ডাকে ৩ মার্চ থেকেই এই পার্বত্য অঞ্চলের বিভিন্ন শিক্ষাপ্রতিষ্ঠানে স্বাধীনবাংলা ছাত্র সংগ্রাম পরিষদের শাখা গঠিত হয়। এছাড়াও রাজা মংফ্র সেইন মহান মুক্তিযুদ্ধে অংশগ্রহণে হাজার হাজার শরণার্থীর আশ্রয়, খাবার এবং চিকিৎসা দানের পাশাপাশি খাগড়াছড়ি পার্বত্য জেলাকে শত্রুমুক্ত রাখার লক্ষ্যে প্রজাসাধারণকে সাথে নিয়ে মুক্তিযুদ্ধে বাঁপিয়ে পড়েন। নভেম্বর মাসের শেষ দিকে সর্বাত্রিক যুদ্ধ শুরু হলে রাজা মংফ্র সেইন মিত্র বাহিনীর সাথে প্রত্যেক মুক্তিযুদ্ধে বাঁপিয়ে পড়েন। মিত্রবাহিনীর উর্ধ্বতন অফিসাররা রাজা মংফ্র সেইনকে অনারারী কর্ণেল র্যাঙ্ক প্রদান করে তাদের একটি ট্যাঙ্ক ব্যাটালিয়নের সাথে সম্মুখ যুদ্ধে পাঠান। আখাউড়া অপারেশনে মিত্রবাহিনীর হয়ে রাজা মংফ্র সেইন যুদ্ধে অংশগ্রহণ করেন। আখাউড়া পতনের পর তিনি আশুগঞ্জ এবং ভৈরবে অপারেশনে অংশগ্রহণ করেন। ১৭ ডিসেম্বর রাজা মংফ্র সেইন মিত্রবাহিনীর সাথে শত্রুমুক্ত ঢাকা শহরে এস পৌঁছান। মহান স্বাধীনতা যুদ্ধে মুক্তিযোদ্ধা রাজা মংফ্র সেইন এর অবদান জাতি কোনদিন ভুলবে না। (আদিবাসী মুক্তিযোদ্ধা, তপন কুমার দে, অন্বেষণ প্রকাশন, ফেব্রুয়ারী বইমেলা-২০১২, পৃ. ৬০-৬৭)।
২১. মুক্তিযুদ্ধে বীরবিক্রম প্লাটুন কমান্ডার উ. ক্য চিং এর অবদান: বান্দরবানের উজানীপাড়ায় মারমা যুবক উ. ক্য চিং, ১৯৭১ সালে ইপিআর বাহিনীতে কর্মরত ছিলেন এবং সেই অবস্থান থেকেই তিনি মহান মুক্তিযুদ্ধে যোগদান করেন। যুদ্ধ করেছেন মূলত উত্তর বঙ্গের বৃহত্তর রংপুর জেলায়। অনেকগুলো উল্লেখযোগ্য অপারেশনে তিনি অংশ গ্রহণ করেছিলেন। এবং মহান মুক্তিযুদ্ধে বীরত্বপূর্ণ অবদানের জন্য তিনি ‘বীর বিক্রম’ উপাধিতে ভূষিত হয়েছেন। তিনি ছিলেন একজন প্লাটুন কমান্ডার। মহান মুক্তিযুদ্ধে তাঁর অবদান চিরস্মরণীয়। (আদিবাসী মুক্তিযোদ্ধা, তপন কুমার দে, অন্বেষণ প্রকাশন, ফেব্রুয়ারী বইমেলা-২০১২, পৃ. ৭৩)।
২২. মুক্তিযুদ্ধে কৃষিবিদ উ. সিট মং এর অবদান : আদিবাসী রাখাইন সম্প্রদায়ের একজন বীর মুক্তিযোদ্ধা কৃষিবিদ উ. সিট মং। মহান মুক্তি সংগ্রামে রয়েছে তাঁর অত্যন্ত বীরত্বপূর্ণ ও সাহসী ভূমিকা। ১৯৭১ সালে তিনি ছিলেন ময়মনসিংহ কৃষি বিশ্ববিদ্যালয়ের ছাত্র। ছাত্রজীবনে তিনি রাজনীতিতে সচেতন ছিলেন এবং ছাত্র ইউনিয়নের সক্রিয় কর্মী ছিলেন। ১৯৭১ সালে তিনি মেজর জেনারেল জলিলের নেতৃত্বে ৯নং সেক্টরে মুক্তিযুদ্ধে অংশগ্রহণ করেন। বাংলাদেশের রাখাইন ভাষা, সংস্কৃতি, ঐতিহ্য ইতিহাস ও গবেষণা সংরক্ষণে কৃষিবিদ উ সিট মং অসামান্য অবদান রেখে যাচ্ছেন। মহান মুক্তি সংগ্রামে তাঁর অসামান্য অবদান জাতি কোনদিন ভুলতে পারবে না। (আদিবাসী মুক্তিযোদ্ধা, তপন কুমার দে, অন্বেষণ প্রকাশন, ফেব্রুয়ারী বইমেলা-২০১২, পৃ. ৯৭-১০০)।
২৩. পূর্বোক্ত, মুক্তিযুদ্ধে বাঙালি বৌদ্ধ সম্প্রদায়, পৃ. ৪৮-৫০
২৪. পূর্বোক্ত আত্মঅন্বেষণ : বাংলাদেশের বৌদ্ধধর্ম ও বৌদ্ধ সম্প্রদায়, পৃ. ১৫২
২৫. ড. দীপংকর শ্রীজ্ঞান বড়ুয়া, বাঙালি বৌদ্ধদের ইতিহাস ধর্ম ও সংস্কৃতি, আবির্ প্রকাশন, মোমিন রোড, চট্টগ্রাম, ২০০৭, পৃ. ২১৯

[লেখক : উৎস বড়ুয়া জয়, বিএ (অনার্স), এমএ, পিজিডি, এমফিল, প্রাবন্ধিক, গবেষক।
ইমেইল: utshabarua20@gmail.com]

